



續文獻通考卷之六十三

皇明進士雲間王圻纂輯

節義考 忠臣二

後梁

王彥章字子明鄆州壽昌人末帝時爲鄆州防禦使與唐將夏魯奇戰馬蹶被執莊宗愛其驍勇欲全活之彥章曰朝事梁暮事晉何面目見天下人乎終不從遂見殺張源德梁末守貝州時郡邑皆歸晉獨貝州堅守或勸出降不從遂被害

後唐

姚洪以指揮使戍閬州梁將董璋破閬州執洪不屈燃鑊

于前令壯士剗其肉而食洪至死罵不絕口明宗聞之
泣下錄其二子

夏魯奇字邦傑唐莊宗賜姓名曰李紹奇常解莊宗重圍
又擒王彥章官河陽節度使徙忠武後董璋攻遂州魯
奇閉城拒之旬月救兵不至城中食盡自刎死

張敬達為唐將契丹兵圍之楊光遠勸敬達降敬達不忍
背唐謂曰何不殺我降光遠即斬敬達降契丹後耶律
德光哀其忠遣人收葬

裴約唐澤州刺史時李繼韜以潞州留後叛降唐來攻澤
州約泣以諭眾曰吾死不從也嬰城自守城陷死之唐
主憫其忠為立祠

後晉 沈斌祁州刺史時趙延壽引契丹兵攻祁州斌在
城上延壽語之曰使君何不早降斌曰侍中父子失計
陷身虜庭忍帥犬羊以殘父母之邦不自媿耻更有驕
色何哉明日城陷斌自殺

後周 韓通為周侍衛親軍副都指揮使恭帝元年遣宋
祖帥師禦漢至陳橋為諸軍推戴通謀率眾禦之軍校
王彥昇逐焉通馳入其第未及闔門為彥昇所害妻子
俱死後宋祖贈通中書令以禮收葬

後蜀 高彥儔為江寧制置使太祖乾德二年曹彬帥師
至夔蜀彥儔拒之力戰不勝奔歸府第整衣冠望西北
再拜縱火自焚死光義得其骨於灰燼中以禮葬之

南唐

劉仁贍為壽州節度使堅守不下世宗遣使招降其子崇諫應其招仁贍立命斬之監軍周廷構以城降周仁贍遇害周以壽州為忠正軍以旌仁贍之節

李延鄒為泗州叅軍時周主自將伐唐攻濠泗州唐郭廷謂知唐不能救命延鄒草降表延鄒責以忠義廷謂以兵臨之延鄒擲筆曰大丈夫終不負國為叛臣作降表廷謂斬之

張彥能南唐楚州守將也周世宗攻之與其副鄭昭業戰死所部千餘人皆無降者

孫晟密州人仕南唐為右僕射及使周謂其副王崇質曰吾終不負永陵一杯土世宗召問江南事不對乃收下獄臨刑怡然南望拜曰臣惟以死報國唐主贈魯國公鍾清為江南主勤政學士時曹彬克金陵清朝服坐于家兵及門舉族死之

胡則為唐指揮使時曹翰攻江州不下刺史謝彥實集眾謀納款則謂其下曰吾屬世受李氏恩安忍負之刺史不忠欲背國爾曹能從我乎眾皆聽命乃與同列宋德明等攻彥實執而殺之集眾為唐固守城陷翰執之數其拒命之罪對曰犬吠非其主公何怪也翰殺之

陳喬為唐門下侍郎開寶八年曹彬克金陵喬與張洎約同死社稷然洎實無死志至是喬徑入白唐主曰今日

國亡願加顯戮以謝國人唐主曰此乃曆數卿死無益也喬曰縱不殺臣臣何面目對士人乎遂自經死

宋

秦傳序江寧人淳化五年以夔陝巡檢使禦李順亂城陷父子皆死太宗錄其次子煦為殿直煦死復以煦弟昉為三班奉職

康保裔為瀛州都部署真宗咸平二年契丹侵瀛州圍之數重左右請保裔易甲以遁保裔曰臨難無苟免正吾效死之日也遂決戰數十合兵盡矢絕而援不至保裔與宋順俱死之

劉紹榮為益州都巡檢使時咸平三年益州戍卒作亂紹榮死之

裴濟為靈州知州咸平五年趙保吉集蕃部來攻靈州濟被圍餉絕刺指血染奏求救兵不至城遂陷濟死焉

景林洙通州人咸平間王均叛州有賊應之者林洙將鄉兵拒戰為賊所戕首隕而身不仆跨馬奔歸州城東北隅人訝而呼之曰公無首矣于是始墜邦人即其地立祠

劉平為鄜延路副總管仁宗景祐時元昊寇延州平帥師往援與賊大戰衆潰平被執死之贈朔方節度使兼侍中

高敏登州人慶曆中為涇源指揮使與西夏力戰而死贈

嘉州刺史錄其三子

任福開封人慶曆中元昊寇渭州不屈死節贈武勝軍節度使賜第一區給其家錢及粟麥追封母妻錄其子

耿昭化河南人仕爲蜀州司戶叅軍盜據城欲脅以官昭化大罵至斷手足不屈而死

耿傳昭化子以父蔭累官通判儀州徙慶州元昊入寇叅任福行營軍事諸將失利或勸傳避之傳愈前指顧自若被數創乃死詔贈右諫議大夫官其四子

王珪涇源都監也元昊入寇珪從任福戰好水川福陷圍中珪誓以死報國復入援福殺數十百人鞭撓掌裂奮擊自若矢中目乃還夜卒

張憲爲武畧大夫慶曆時貝州宣毅卒王則據城以叛憲與其子琳同死之贈武功大夫官其兩子

馬遂開封人爲北京指揮使王則叛賢昌朝使持榜入貝州招降旣見則諭以禍福不答遂奮起抵則拒其喉毆之流血賊黨攢刃聚譟乃縛而支解之事聞仁宗嘆息久之贈宮苑使官其五子

董元亨深州人仁宗時以貝州通判罵王則爲所害贈太常少卿錄其子三人

李英高要人爲欽州推官死儂寇之難一家十有三人贈比部郎中廟食高要

宋士堯馬平人與儂寇力戰于邕州敗北賊斷其首屍不

什猶奔馬而還贈屯衛大將軍

曹覲字仲賓建安人爲建州司戶叅軍皇祐中知封州儂智高叛攻封州率徒決戰不勝被執賊戒勿殺粹使拜且誘以美官覲不肯拜且詈賊猶惜不殺徙置舟中覲兩日不食賊知其無降意害之至死詬賊不絕事聞贈太常少卿錄其四子後立廟封州

張拱廣西都監也儂賊圍邕州拱自州來援旣入而城陷不屈而死踰月得其屍如生

王正倫以太尉將兵擊儂賊戰死于難子景仁卽其地結草堂祠之朝廷嘉其節贈節度使謚曰忠顯

張日新安仁人皇祐間爲廣西邕州都監儂智高陷邕日新力戰不支被執不屈死之

孔宗旦魯人皇祐中以邕州司戶叅軍叱罵儂智高爲所害贈太子中允

趙師旦積之從子皇祐中以太子右贊善大六移知康州奮罵儂賊被害贈光祿少卿賜其母長安縣太君冠帔官其子弟并從子三人

王從政爲閣門祗候與儂賊戰于太平場被執以沸湯沃之終不屈而死贈信州刺史錄其孫三人

梁仲寶賓州人儂賊犯境率衆力戰死之郡人爲立廟徐靈博白人爲宜州長史追儂賊至金城驛力戰死之贈

大理丞

郭恩開封人累官秦隴路兵馬鈐轄嘉祐中夏人入寇臥牛峯恩與力戰自旦至食時失利被執不屈自殺贈同州觀察使錄其子第有差

張吉為淮安鎮守烽卒神宗熙寧三年夏人寇慶州吉為夏人所掠驅至城下呼令降吉反其辭賊怒言之至死罵不絕口事聞贈內殿崇班勇烈將軍錄其子

景思忠字進之普州安岳人神宗時以遂州駐泊都監與夷人力戰而死官其子及同死者之子七人

王奇汾州人神宗時以廣西都監死于蠻寇贈皇城使忠州防禦使官其後六人

蘇緘晉江人為邕州知州熙寧九年交趾人圍邕緘悉力

拒守外援不至城遂陷緘殺其家三十六人因自焚死

城中人感緘之義無一人從賊者帝聞之嗟悼贈奉國

軍節度使謚忠勇邕人為立祠元祐間賜額懷忠子明

正孫廣淵直溫與緘同死皆蒙褒贈

高永能元豐初破夏人有功進榮州團練使元豐五年夏

人寇永樂城陷其孫昌裔欲挾之從間道走永能嘆曰

吾結髮與西羌戰未嘗挫今年已七十受國恩恨無以

報此吾死所也遂戰而死詔贈房州觀察使錄其子世

亮為忠州刺史

張建侯政和中為辰州守與盧陽令王憲之救鎮江寨為

賊黃安俊所執迫使諭寨中人出降建侯給諾至寨下

大呼曰爲人當識順逆我萬無求全汝等堅守勿二賊怒并憲之俱害之郡人立祠以祀

徐禧分寧人元豐中城永樂禧以給事中
被詔與內侍李舜舉往相其事會賊趨新城禧亟往
禦或曰被詔相城禦寇非職也禧不聽
與舜舉俱至永樂城陷死之贈吏部尚書謚忠愍

高永年河東番官也崇寧初知岷州爲降羌所執死之

彭汝方知衢州徽宗宣和初方臘陷城汝方罵賊以死贈龍圖閣直學士謚忠毅官其家七人

鞠嗣復宣和初知休寧縣爲方臘所得不屈賊不忍加害卒生還

宋旅字庭實莆田人知剡縣不屈於方臘而死贈朝散郎錄其四子

詹良臣字元公睦州分水人以縉雲尉不屈于方臘被害贈通直郎官其子孫二人

丁仲修字敏之温州人方臘陷樂清將渡江巡檢陳奎往捕死之賊至仙遊夏祥遣輔褒迎戰數十合褒死之仲修乃率鄉兵禦諸樂灣力屈而死

項德武義人郡之禁卒也與方臘戰于黃姑嶺下死邑人哭聲振山谷圖其像歲時祝之

蔣煜仙居人有文學方臘欲妻以女煜辭之脅以拜亦不從寇曰吾戮汝矣煜伸頸就刃罵聲不絕而死

胡榘爲婺州教授遇方臘作亂以武奮遇害舉家死之詔
贈奉議郎推恩二子

王行之太平人初除婺州士曹方臘黨寇婺州守臣皆遁
去行之曰吾獄官也守吾職死分耳遂遇害事聞贈通
直郎官其一子

毛臬字淑縝江山人以特恩爲歙士曹睦寇攻城官吏皆
遜臬曰吾職司寇獄有繫囚義不可去乃攝州事時二
子貢辟雍卽遣人持獄印縋城以出令獻于朝城陷臬
坐府上賊脅使降不屈罵賊不絕口死之妻錢氏掖其
姑弗忍去俱遇害事聞贈朝請郎官其後三人

劉士英宣和中通判太原府與將士王稟俱死于金寇

程迪宣和中從楊惟中征方臘有功累遷榮州團練使時
金人入寇詔以迪提舉永興路軍馬及永興破迪率其
徒力戰身被創幾徧絕而復蘇猶厲聲叱戰不已遂死
之詔贈明州觀察使謚忠愍

張克戢字德祥侍中耆曾孫也宣和間知汾州與虜力戰
而死一門同死者八人贈延康殿學士銀百兩絹五百
匹紹興中謚忠確

傅察字公晦孟州濟源人宣和七年以太常少卿奉使金
虜迺至境上幹離不脅之降不屈死之

江仲明台州人宣和間寇亂載老母逃山澗中猝遇寇逼
使降仲明奮起罵賊死之

朱昭字彥明府谷人宣和中爲震武城兵馬監押攝知城
事金人逼城盡殺其家人死守後中矢而死

張甲德興人爲邕州巡檢宣和時金兵犯順甲力戰死德
祐元年詔贈忠利侯

史抗濟源人宣和末爲代州沿邊安撫副使金人圍代急
抗夜呼二子稽古稽誓曰吾昔語用事者鴈門宜擇帥
增戍彼皆不吾省今城必陷吾將死事汝輩亦勿以妻
子爲念而負國也二子泣曰惟命明日城破父子三人
突圍力戰死于城隅

李翼麟州人宣和末爲代州西路都巡檢使金人取代遣
使諭降翼射却之後兵敗被執粘罕欲臣之怒罵不屈
而死同時不屈而死者縣令李聳丞王唐臣尉劉子英
監酒闔城將官折可與

陸有常知臨淄縣臨朐土兵作亂有常率兵拒守死于陣
知益都張侃千乘縣丞丁興宗亦死之

孫益以福州觀察使知朔寧府被命救太原時張孝純已
將太原降金不肯啟門遂死之初益奏郡人孫谷爲掾
屬至是嘆曰吾身已許國又不忍負孫公亦死之

張確守隆德府時粘沒喝入威勝軍或勸確潰圍出確斥
曰吾守土臣頭可斷膝不可屈力戰而死

种師中洛陽人累官奉寧軍承宣使會金人內侵師中戰
死贈少師謚莊愍

李彥仙字少嚴鞏昌人爲陝州知州靖康元年金婁室攻
陝奇彥仙才百端誘陷彥仙悉斬其使力盡城陷投河
死贈彰武軍節度使建廟商州號忠烈官其子給宅一
區田五頃謚忠威時裨將龍門邵雲夏縣呂員登陝縣
宋炎與賈何闔平趙成皆死並贈官

杜翊世華陽人通判懷德軍靖康初金兵奄至城陷翊世
先火其家與妻張同縊死贈朝議大夫官其後十人名
所居曰忠義坊

高子儒狄道人知蘭州龕谷寨金人陷熙河子儒聞副總
管劉惟輔戰死力窮莫支乃先自刃其家與軍將韓清
皆罵賊而死

黃璘字邦美浦城人登政和八年第後丞拱州靖康元年
金人襲拱州城陷虜迫郡縣吏役爲鄉導璘移病不出
虜驅迫之遂赴井死事聞贈朝奉郎官其弟之子爲璘
後

蔣興祖常州宜興人徽宗時知楊武縣靖康初金兵犯京
師道過楊武或勸使避興祖曰吾世受國恩當死于是
與妻子留不去及師至力不敵死焉年四十四詔贈朝
散大夫

楊震字子發代州崞人靖康中知麟州守建寧砦與子居
中執中俱死建炎二年贈武經郎長子存中貴請于朝
謚恭毅

曾悟字蒙伯肇之孫靖康中爲亳州士曹金人破城抗辭
慢罵衆刃劓之屍體無存者妻孥同日被害

李震汴人靖康初金人迫京師震時爲小校率所部三百
人出戰殺人馬七百餘已而被執問南朝皇帝所在震
曰我官家非爾所當問鬻割垂盡猶罵不絕口

司馬朴光兄旦之孫靖康初以兵部侍郎使金握節而死
贈兵部尚書謚忠潔

郭忠孝字立之洛陽人少以父逵任補官舉進士累遷河
東路提舉坐事靖康初爲永興軍路提點刑獄及金人
寇永興兵寡或勸忠孝以監司出巡可以避禍忠孝不
答與經畧唐重分城而守金人陣城下忠孝募人以神

臂弓射之敵不得前已而城陷忠孝死之贈大中大夫
歐陽詢字全羨廬陵人靖康中以將作監臣出使極言祖
宗之地不可割時宰怒欲殺詢迺遣詢奉使割深州詢
至深州城下慟哭謂城上人曰朝廷爲奸臣所誤吾已
辦一死來矣汝等宜勉爲忠義報國金人怒執送燕焚
死之詔錄其忠無子官其壻曾敏恭

姜綬麗水人以忠勇士召募刳股藏書縋下南壁將往南
京求援爲金邏騎所獲厲聲叱罵被害官其子特立承

信郎

徐徽言西安人靖康中知晉寧軍兼嵐石路沿邊安撫使
晉寧不守金挾徽言去不屈死之統副孫昂及士卒皆

不屈被害事聞贈晉州觀察使謚忠壯再贈昭化軍節
度徽言子岡從孫適俱死事世著忠義

孫昂靖康初爲太原路兵馬都監與徽言協志禦虜後引
刀欲自刎爲金人所奪擁至軍前不屈而死贈成忠郎
團練使昂父翊宣和中知朔寧州抹太原死于陣亦世
濟忠義云

李琪永福人官至武功大夫金虜犯闕召天下兵琪謂蔣
炳文曰主憂臣辱主辱臣死豈可以道遠便自營私乎
募死士三千人倍道兼行與賊戰死之增忠州防禦使
宋炎陝縣人蹶張命中補秉義郎金人圍城射死數百人
比再圍以勁弩發毒矢殺千餘人城陷虜求善射者官
之炎不應之戰死

李若水字清卿曲周人靖康中爲吏部侍郎帝如青城至
金營金人逼帝易服若水抱持而哭詆金人爲狗董金
人曳若水出擊之且令曰必使李侍郎無恙若水絕不
食或勉之曰事無可爲者今日順從明日富貴矣若水
嘆曰天無二日若水寧有二主哉其僕亦慰解之曰公
父母春秋高若少屈冀得一歸覲若水叱之曰吾不顧
家矣後旬日粘沒喝召計事若水因歷數而罵之監軍
撻破其古噀血罵愈切至以刃裂頸斷舌而死金人亦
相與言曰遼國之亡死義者十數南朝惟李侍郎一人
呂由誠字子明誨之季子以父恩補官靖康初徙知集慶

續文獻通考 卷之六十三
十三
府時羣盜蜂起崎嶇至郡金兵來攻由誠與判官趙令
佳同心誓守城陷俱被執不屈死之

龔端新昌人欽宗稱其凜凜有直臣節後奉使河東路聞
二帝北狩憤惋而卒

程振樂平人靖康中拜刑部侍郎金人寇汴梁索金帛無
厭振與梅執禮等四人詣金營言比屋盡空無以塞命
虜酋怒遂遇害贈端明殿學士謚剛愨

孫鉉自眉徙居戎州爲博士二帝北狩金人以鉉有名上
庠指名徵取之義不屈以死

王履以修武郎副李若水使金抗虜不屈與若水俱死臨
死畧無懼色且歌詩末章云矯首問天今天卒無言忠
臣效死兮死亦何愆人聞而悲之

劉韜字仲偃崇安人第進士靖康中以資政殿學士充河
北宣撫副使太原陷召入覲爲京城四壁守禦使京城
失守遣使金營金人欲用之歸書片紙使親信持報諸
子卽沐浴更衣酌卮酒而縊建炎初贈資正殿大學士
累贈太師謚曰忠顯

吳葦字義夫華陽人靖康初爲閣門宣贊舍人女直立張
邦昌爲楚帝葦率衆討邦昌不克死之

吳懋晉陵人靖康末仕爲禮部員外郎金人立張邦昌王
時雍用事坐政事堂懋發憤罵之曰反虜吾不能擊汝
如段秀實耶時雍面頸俱赤後吳升莫儔以表狀詣虜

營懋竟不屈

郭許德順中安堡人靖康中爲涇原副將不降金虜而死
贈武翼大夫忠州刺史同死者西安朱友恭亦涇原副
將贈敦武郎

王士言武舉進士靖康中畢力禦金虜死于澤州贈拱衛
大夫忠州團練使官其後五人

祝公明處州麗水人爲太原府蓋縣主簿靖康中與金人
力戰而死贈承事郎子陶爲唐州司戶亦死官所

陳邁知中山府爲金師所圍半年外無援師京都旣陷割
兩河求和邁弟光祿卿適至中山臨城諭旨邁遙語曰
主辱臣死吾兄弟平居以名義自處寧肯賣國家作囚

奴乎適泣曰兄但盡力勿以弟爲念後爲步將沙振所
害及其子錫并僕妾十七人建炎初贈特進

李熙靖晉陵人提舉醴泉觀邦昌使直學士院固拒不食
而卒贈延康殿學士

謝貺汝州人欽宗卽位上封事十篇論事切至金人犯汝
州貺自襄陽領兵往援力戰而死

李涓南豐人靖康之難率兵勤王至蔡州與金人戰死之
高宗官其二子

霍安國靖康中知懷州城陷一門無噍類高宗建炎元年
詔諸路詢死節之臣以聞贈延康殿學士

張叔夜永豐人從淵聖北行至白溝河仰天大呼扼吭而

卒建炎紹興間塋衣冠于寶積院之西朝廷褒其節詔有司卽墓立廟賜額旌忠謚忠文

李邈字彥思清江人靖康中以青州觀察使知真定城陷金人欲其被髮左衽邈自去髮爲浮屠遂遇害高宗贈昭化軍節度使謚忠壯

劉翊靖康中爲真定府路都鈐轄金兵逼之解絛自縊死徐揆衢州人靖康中以太學生上書金酋請還二帝爲所殺建炎中贈宣教郎官其後

郭永大名元城人爲北京提刑建炎二年女直陷北京永死之家屬皆遇害

劉汲丹陵人爲鄧州安撫使時女直陷鄧州汲死之通判鄭州趙伯振知潁昌府孫默知汝陽府郭贊皆不屈死劉倚友字夢澤處州人靖康初以進士宰開封金人犯闕受檄爲東壁彈壓官登城按視爲寇所獲脅使降倚友罵不絕口死之

孫昭遠字顯叔眉山人建炎中爲河南尹金兵來攻衆欲擁昭遠南還昭遠罵曰若等衣食縣官不以此時報國耶叛兵怒反擊昭遠遂遇害官屬無免者贈徽猷閣待制

唐重字聖任眉州彭山人建炎中爲永興軍經畧使知京兆府城陷不屈而死贈資政殿學士謚恭愍時副總管相宗閔提舉軍馬程迺等俱死之

續文獻通考 卷之六十三
曾孝序字逢原晉江人建炎初知青州金兵至為叛卒所
害城遂陷贈孝序光祿大夫謚威愍子許承議郎餘贈
官有差

陳求道字得之咸寧人建炎中為襄鄧隨郢鎮撫未幾招
撫劉忠叛欲奉求道為主求道正色斥罵賊拔出舌斷
之妻及二子俱被害

王琦弓門砦巡檢建炎中禦金人于熙河金人立招降旗
衆皆招拜琦獨不拜金人殺之

楊粹中真定人建炎二年知濮州時金人入寇粹中固守
月餘城陷粹中登浮圖不下粘罕嘉其忠義許以不死
粹中竟不屈而死事聞贈徽猷閣待制

向子韶字和卿敏中之從孫舉進士累官京東轉運使高
宗朝知淮寧府金人犯城子韶親擐甲胄率諸弟誓以
死守及城陷為賊所執執手責罵金人殺之闔家遇害
贈通議大夫謚忠毅

周中繼州人建炎二年金人攻城中率家衆乘城拒守城
陷闔門死之紹興六年贈官

杜昉為密州通判建炎初寓居武陵賊鍾相亂欲強使從
已昉罵不絕口遂遇害

上官悟字仲達用蔭累官秘閣修撰充京畿轉運使建炎
三年為京東副留守時劉豫叛降金因遣人說降悟斬
其使復賂悟左右使說悟復斬之金兵攻東京愈急力

不能支城陷死之贈右文殿修撰官其後五人

王復知徐州建炎三年女直陷徐州復死之闔門百口皆

被殺贈資政院學士謚壯節

章雲就麗水人建炎中賊將逼處州雲就以守將募往諭

降賊許諾既而官兵掩至賊以爲賣已遂遇害後人立

祠祀之

張縝金壇人建炎中守揚州金兵圍城城陷縝及妻子皆

死之

楊邦乂吉水人政和進士知溧陽縣僕射杜克隆金濟江

鼓行迫城李稅陳邦光率官屬迎拜邦乂以血書衣裾

曰寧作趙氏鬼不爲他邦臣金宗弼遣人說之明日

遙望宗弼大罵宗弼怒剖其心事聞贈直秘閣賜田三

頃官爲殮葬卽其地賜廟褒忠謚忠襄官其四子

崔縱字元矩臨川人高宗將遣使通問二帝縱毅然請行

乃授朝請大夫右文殿修撰試工部尚書以行比至首

以大義責金人請還二帝又三遺之書金人怒徙之窮

荒縱不爲少屈久之金人許南使自陳而聽其還縱以

王事未畢不忍言又以官爵誘之縱以恚恨成疾竟握

節以死洪皓還始歸縱之骨詔以兄子延年爲後

洪皓樂平人建炎初使金不屈欲殺之一酋曰此忠臣也

爲請免死得流冷山凡一十五年恒以仁者以大事小

智者以小事大章論金酋故宋得與金和歸卒謚忠宣

章論金酋故宋得與金和歸卒謚忠宣

吳安國字振卿處州人紹興中以太常少卿使金值金人渝盟拘留脅服之安國毅然正色曰我首可得我節不可奪惟知竭誠死王事王命惡敢辱金人不敢犯遣還後知袁州卒

朱弁建安人文公叔父紹興中副王倫使金金人令使與副探籌歸報弁曰吾將命出國門已置死生度外豈幸得先歸哉古者使人有節今無節有印願以印留于我正使先歸吾獨在此于是偷解印與之而歸弁留金十餘年備嘗艱苦後與洪皓俱歸至今子孫有留印堂

林冲之字和叔莆田人靖康初以主客郎中副中書侍郎陳過庭使金同被拘執初猶給乳酪迨宇文虛中受其命金人亦以是邀之冲之奮勵見詞色金人怒徙之奉聖州二年過庭卒金人逼冲之仕偽齊不屈徙上京又不屈置顯州極邊沍寒之地幽佛寺十餘年漸復飲茹以義命自安髭髮還黑病亟語同難者曰某年七十二持忠入地無恨所恨者國讐未復耳南向一慟而絕僧窆之寺隅洪皓歸朝以聞詔與二子官過庭亦卒于燕建炎中謚忠肅

滕茂實字秀穎東陽人一云臨安人靖康元年以工部員外郎假工部侍郎副路允迪出使為金人所留時茂實兄絢通判代州已先降金粘罕素聞茂實名乃遷之代州又自京師取其弟華實同居以慰其意欽宗自離都

城舊臣無敢候問啟居者茂實聞欽宗將至卽自爲哀
詞且篆宋工部侍郎滕茂實墓九字取奉使黃旛裹以
授其友人朔寧府司理董詵欽宗及郊茂實具冠幘迎
謁拜伏號泣金人諭之曰國破主遷所以留公益將大
用逼令易服茂實力拒不從見者墮淚茂實請從舊主
俱行金人不許憂憤感疾卒雲中詵歸錄所爲哀詞言
于張浚以詵爲陝西轉運判官上其事紹興二年贈龍
圖閣直學士官其家三人

魏行可建州建安人建炎中以太學生應募奉使補右奉
議郎假朝奉大夫尚書禮部侍郎充河北金人軍前通
問使時河北紅巾賊甚衆行可始懼爲所攻旣而見使

旌皆引去行可見金人于澶淵金人知其布衣借官待
之甚輕留不遣行可嘗貽書金人警以不戢自焚之禍
大國舉中原與劉豫劉氏何德趙氏何罪若亟以還趙
氏賢于奉劉氏萬萬也紹興六年卒十三年張邵來歸
言行可執節没于王事行可父通直郎伯能亦愬于朝
遂贈朝奉郎秘閣修撰先已官其二子一弟至是復官
其一孫行可之使也吳人郭元邁以上舍應募補右武
大夫和州團練使爲之副不肯髡髮棄官亦卒于北
閩進隸宣武建炎初遣使通問進從行旣至雲中府金人
拘留使者散處之進亡去追還留守高慶裔問何爲亡
對曰思大宋耳又問我主待汝有恩汝亡何故進曰錦

衣玉食亦不戀也慶裔義而釋之凡三亡乃見殺臨刑
進謂行刑者吾南面受刃南則我皇帝行在也行刑者
曳其臂令面北進踴身直起盤旋數四卒南面就死
朱勣爲武進校尉從使者至北在粘罕所爲求妻室固其
意不半月亡去追之還勣含笑死挺下

李之邵建炎初爲新喻武尉隆祐太后幸虔州從後軍叛
之邵拒之兵敗不屈大罵賊虜殺之賊酋壯其言誅害
之邵者

易青惠州人爲都督行府摧鋒軍經畧使效用紹興中爲
廣賊所執終不從賊怒焚死之贈保義郎閣門祗候

何斌爲殿前司將官童德興提禁旅戍邵武紹興中竭力

禦盜而死其屍殪立移時始什贈武節大夫錄其後一
人

連萬夫建炎四年郡賊犯應山破之賊知萬夫勇敢謀欲
留萬夫萬夫怒厲聲罵賊爲所害贈右承務郎

鄭覃字季厚明州人靖康二年貢于鄉建炎四年金人陷
明州覃爲兵所劫去逼使之降厲辭罵不屈躍入水中
死妻董亦自沈後以孫清之顯貴贈太師秦國公董秦

國夫人

趙立徐州益村人建炎四年以鎮撫使兼知楚州堅守孤
城爲飛砲所中而卒贈奉國節度使儀同三司官其子
孫十人謚忠烈

阮駿字千里莆田人紹聖初登進士第建炎初為河南府少尹金人來寇拒戰不利亟收兵護神御殿而以餘兵再戰兵敗抱神御罵賊至死聲不絕口特贈奉直大夫薛慶起羣盜據高郵後歸朝與金人力戰而死贈保寧軍承宣使官其家十人封其妻顧氏

楊照濠州將官也金人圍城照刺賊洞腹抽腸俄中流矢死有都統丁金者遇賊十八里洲被圍大呼其徒勉以毋得負國一舟二百人皆鬪死並贈承信郎錄其後

趙昌進賢人建炎初以書生為閭門祗候舍人王虎謀逆率鄉民力戰死之紹興中贈修職郎

凌唐佐字公弼休寧人登元符進士建炎初知建康府城陷劉豫使守應天唐佐欲圖豫密疏虛實上于朝事泄被捕見豫責豫曰國家何負于汝而反面事虜耶豫怒命引出斬之事聞贈徽猷閣待制

閻琦靖康中為承務郎二帝北遷後宗室南渡不及者多散民間豫募人索之琦匿不以聞為豫杖死

劉化源隴州人知隴州城陷被執金使人守之不得死遂驅入河北鬻蔬果隱民間十年終不屈辱同時原州通判朱璞簽書溥州判官劉長儒皆與化源同鄉亦不屈

于豫紹興中各轉兩宮奉祠又鳳翔教授陰焯彭陽知縣李嘉皆守節不屈贈朝奉郎官其家一人

龔楫字濟道原之孫仕為兵部侍郎本處州人居和州元

木據和州楫率家屬襲之不克而死

方允武衢州人為宜興巡檢建炎三年與金寇力戰而沒
曾志字仲常鞏之孫建炎初通判温州金茵巴八陷越志
獨不屈盡驅其家屬四十口同日殺之事聞官其弟與
三子及兄子皆將仕郎

宋昌祚和州鈐轄建炎初兀朮犯和州州人推昌祚權領
軍事城破昌祚與倅唐璟歷陽令寒譽司戶徐兢縣尉
邵元通及指揮鄭立軍士胡廣皆死譙樓上軍士多不
降保麻湖水若事聞贈官錄其子弟

郭瓚內江人建炎初為汝陽令金人陷城瓚朝服坐廳事
戟手大罵與二子俱死

金光庭羅源人累官光祿寺丞出知南陽郡建炎初金人
陷南陽不屈而死舉家悉遭殲戮

王相如宣城人建炎初江右盜起被執逼令草檄相如奮
髯曰吾雖死不能為賊作牒遂遇害盡室殲焉

趙不試太宗六世孫建炎初知相州金人求割地不試固
守不下及州被圍久外援不至不試知不可為遂登城
與金人約勿殺許之既啟門乃納其家井中然後以身
赴井命提轄官實以土州人皆免于死

趙令晟燕懿王玄孫建炎中知黃州城陷不屈而死贈徽
猷閣待制謚忠愍

趙振伯太宗八世孫建炎中通判鄭州守城力戰遇害贈

朝請大夫官其一子

趙叔憑太宗之後建炎間爲陝州都監金人圍陝州旣久援兵不至城危時叔憑子官盧氏遺以蠟丸書曰人臣當死難况吾以近屬其可辱命耶死固其所也遂死之時通判王沂職官劉效陳思道馮涇李岳杜問縣令張玘蔣佐盧亨等五十一人俱死無降者

趙士跋漢王曾孫靖康末爲右監門衛大將軍吉州團練使金人驅宗室北行士跋得間道遁去居邢州結土豪將舉義金人覺而殺之贈保寧軍節度使謚忠果

趙叔皎秦悼王四世孫建炎中爲德州兵馬都監城陷爲金人所執不屈而死

趙訓之字誨道秦悼王五世孫建炎二年知吉州永豐縣與尉陳自仁衛孟太后于虔州俱爲叛賊所害贈訓之朝散郎直秘閣謚忠果自仁通直郎

趙聿之安定郡王叔東子建炎中爲成忠郎金人陷潭州爲所執大罵而死贈左監門衛大將軍時武經郎衛玠亦死之贈武經大夫皆官其家

李直字可大交州乾封人建炎中劉豫使守大名密謀圖豫事洩而死贈官立祠曰愍忠又有武顯大夫孫安道爲應天府兵馬鈐轄城陷不得歸謀挺身還朝爲人所害而死贈忠州刺史

陳淬字君銳莆田人建炎中以淮南招撫使援建康與從

子仲敏俱死贈拱衛大夫明州觀察使官其子壻

郝仲連昌化人建炎中為貴州防禦使權河中府事城陷

不屈及其子皆死贈中侍大夫明州觀察使

韓青為熙河馬步軍第六將間行從劉惟輔為金人所擒

罵不絕口死

彊霓自金歸宋知環州與其弟震堅守孤城城陷不屈死

焉贈觀察使立廟西和州賜額旌忠

李伸知天長縣建炎中金虜陷城不屈而死

牛皓福津人為川陝宣撫後軍中部將與金人力戰而死

時承信郎高萬且罵且戰與熙河路部將任安宣撫司

隊官秦元薛琪張育皆死于陣後皓安贈朝大夫官其

家五人贈萬元等官錄其子

孫暉霍丘人靖康之亂率淮民團結保護鄉井擢招信尉

建炎中金人將渡淮暉率射士民兵禦之城陷竟死于

勅書樓

屈堅為忠州防禦使建炎三年救陝府圍被害贈三官錄

其家五人

方致堯寧國人賊戚方寇寧國致堯中流矢臥不能起遂

為所執罵而死謚義烈詔立祠祀之

王棣守開德府建炎二十年九月金兵寇開德棣死之

孫安武長沙人為州學正金人入城安武率居民巷戰金

人四面縱火人皆竄伏惟安武挺身罵不絕口死

劉玠潭州將官建炎中金人陷潭州玠挺身血戰中數十矢死于陣民爲立廟張栻作記

胡唐老字俊明宿之曾孫也建炎中知鎮江府潰卒戚方等欲犯臨安唐老諭以順逆衆環脅之唐老怒罵遂遇害贈徽猷閣直學士謚定愍時安撫司機宜鄭凝之亦以兵死詔官其家一人

王儔以通判真州權通判廣德軍建炎末戚方爲亂與權判官李唐俊權法司潘僞權知廣德縣韋績權丞蔣瓊皆死俱贈卹

朱嗣孟樂平人以廣德司戶安撫戚方被害贈宣教郎官其子

劉晏字平甫嚴州人以遼進士來歸累功直龍圖閣後授宣城爲戚方所害贈龍圖閣待制官其子四人死所立廟曰義烈

鄭振字亨叔仙遊人率鄉兵禦詹鈇又賊遇害廟食里中袁顯益陽人建炎中湘寇楊么猖獗顯請于縣宰魏舜臣團鄉兵以捍一日賊傾寨來戰顯極力鏖戰爲賊所得賊欲用之顯罵賊不屈么置諸鼎鑊而死

程全休寧人爲筠州都監金人犯江西守臣遁全攝州事賊劫掠至郡全領兵拒之兵少力罷賊遂剗其腹而去贈協大夫錄其子孫

孟彥卿忠厚從父建炎中通判潭州與潰賊杜彥戰死于

瀏陽時添差通判趙民彥邑士謝淳俱于賊力戰被執
殺之贈彥卿民彥直龍圖閣官其家各三人淳贈成忠
郎官其子希古後朱熹帥潭為請立廟

王煥知武當縣建炎中賊犯均州煥率邑人保山寨賊至
或勸之遁煥曰使吾有此心則不能與邑人為此舉矣
遂舉家死之

謝臯開封人為鎮撫使統制官建炎中李成陷虢川欲降
之臯指腹示賊曰此吾赤心也自剖其心以死

薛良顯字貴勤瑞安人以河東轉運使與江寧亂軍周德
力戰不勝而死贈卹甚渥

丁公膺醴陵人為高郵尉紹興初拒金兵力戰死之朝廷
嘉其忠節官其子倚

梁楚電白人紹興中攝縣令交趾犯境力戰連斃數賊後
城破被害高宗贈禮部侍郎

唐傑知扶風縣與金將馮宣戰宣愛傑欲招之傑奮曰吾
當死于陣不能降敵宣乃殺之

徐景知興化縣楚民胡德等寇掠馳入縣治景諭以順逆
禍福賊怒欲害之景曰人誰不死得死王事亦何不可
但勿傷百姓吾含笑入地矣賊義而不加害

王玠蘄黃鎮撫使司幹辦公事會鎮撫使孔彥舟謀叛玠
開陳百端不聽入罵曰逆賊萬段彥舟怒并家屬沈之

龍眠磯

范旺順昌人爲縣巡檢司軍校紹興初順昌盜俞勝苛作亂土軍陳望者與射士張袞謀舉若應之旺叱不從凶黨剔其目而殺之妻子皆遇害賊平旺死迹在地隱隱不沒邑人驚異爲設像城隍廟歲時祭享六年詔贈承信郎更立祠號忠節二十八年復詔立愍節廟以祀之呂祉字安老建陽人宣和初上舍釋褐紹興中知建康府累官兵部尚書參謀軍事以酈瓊叛執祉迫使趨劉豫祉大罵不從遇害贈資政殿大學士慶元間立廟賜額以旌其忠

李靚龍泉人紹興十年與虜戰敗死之詔贈兩官仍官其一子

舒繼明羅山人善射紹興間守信陽僞齊劉豫襲郡城矢盡被擒罵賊而死

唐敏求字好古當塗人爲德化主簿盜起挺身率衆扞禦遂遇害贈升朝官補其子楠將仕郎

王師道字居中兗州人紹興中任吉州粟傳若巡檢與賊戰于吳村而死立廟其地官其二子

楊載涪陵人金人立劉豫載願得白刃橫行虜中當手刃劉豫張浚壯其言使偕十士至金僞降載行反間豫果廢及欲刃虜酋而十士已亡其八遂決南歸

朱勇利州都統捍金人有功戰于瓦亭寨被執罵不絕口死賜廟名忠節

朱友恭涇源路第一副將捍金人有功後被執不降遇害
朱蹕湖州安吉人爲錢塘令金兵迎戰歎敵使民得爲逃
計中流矢創甚猶叱左右負已擊賊後數日遇害

王倫大名人紹興十四年以行人使金金欲以爲平灤二
路都轉運使倫曰奉命而來非降也金脅以威倫拒益
力俾縊殺之倫遂冠帶南鄉再拜慟哭曰先臣文正公
以直道輔相兩朝天下所知臣今將命被留欲污以僞
職臣敢愛一死以辱命遂就縊於是河間地震雨雹三
日聞者哀之

姚興相州人以武功累遷荆湖南路兵馬副都監紹興二
十一年金人渝盟興隸都統王權麾下時權奔仙宗山
嚴兵自衛興告急數不應初李二者嘗有私恩于權因
得出入軍中竊權旗幟以遺金人至是金人立權旗幟
以誤興興奔之父于俱死焉詔贈容州觀察使謚忠毅
立廟戰所賜額曰旌忠

孫知微高宗時通判舒州淮賊劉忠薄舒州知微繕城郭
治甲兵力與之抗久而不下及入舒知微被執又不屈
忠怒齧食之後朝廷官其二子

李明高宗時金兵入犯明從宣撫使楊存中力遏其衆外
援不繼死之廕其子守中爲進武校尉

李邁字彥和龍泉人紹興中以承信郎與金人戰于西京
天津橋死之

劉宣爲秦鳳路兵馬都監密遺蠟書與吳玠相約且欲率金將任拱等以所部歸朝金人覺取宣縷髻之家屬配

曹州

韓浩知淮州高宗時金兵攻濰州城陷浩與通判朱廷傑皆力戰死北海縣丞王允功司理王震皆全家陷沒浩特贈三官官其家三人餘各官其家一人

王忠植太行義士紹興中以功爲河東經畧安撫使爲叛將趙惟忠所執不屈而死贈奉國軍節度使開府儀同三司官其家十人

唐琦本衛士建炎中欲襲擊金將琶八不克而死詔立廟賜名旌忠

尚俊太平州慈湖砦兵紹興中周青等據州叛俊隸青左右得其陰謀潛結其徒期殺賊于是伺青上馬斫中頰而其徒不敢前遂與妻子俱遇害贈俊修武郎立祠號登勇

翟興字公祥河南伊陽人紹興元年爲忠州團練劉豫憚之啗裨將楊偉以利偉殺興攜其首奔豫弟進知河南府亦爲賊楊進所害俱贈官錄其家

劉惟輔涇州人任熙河副總管爲金人所執誘之百方竟不從而死詔贈昭化節度使官其子孫十二人立廟成州號忠烈

朱良字良伯仕海鹽尉時金人分兵入境良集射士百餘

奮而前然力不敵竟死事聞官其子思孜等

劉十六郎瑞金人金虜犯境十六郎昆弟三人義勇戰死
岳飛以聞詔立祠旌之

魏彥明開封人通判延安金人陷西城彥明死節詔贈中
大夫官其一子

郭正孫邛州人官大府寺丞帥興元金人內侵屹守孤城
三戰三却左右勸之避正孫不從遂死于敵

金從龍浮梁人知廬州虜寇大至力不能支死之贈官廕
其子

張文之樂平人通判濠州金兵至被執送燕山欲授以官
不屈囚之士窟後王朴清于囚得一家書附還朝廷悼

嘆月給恤其家官其子孝忠

黃友字龍友平陽人也金人入寇友通判澶州戰敗被執
不屈死之帝書忠節傳家四字旌其門

鄭驥字潛翁玉山人建炎初以直秘閣知同州金人來寇
援絕力孤城陷虜衆欲降之不屈曰所謂太守者守死

而已遂死之詔贈通議大夫謚威愍官其子五人後復
加贈樞密直閣學士立祠同州賜廟額曰愍節

毛士葵富川人爲化州石城令李接反來攻城士毅謂尉
曰吾與君當以死衛百姓糾合義丁與賊戰衆寡不敵

遂罵賊死高宗贈承事郎

劉位招信人知滁州節制徐泗二州軍事金人入寇遣使

誘降位斬其使後出戰中流矢歿于陣贈建寧軍節度使建廟滁陽號剛烈

邊知章字公望通判開德府金人犯闕尋以和退明年冬虜大至城下知章軍潰死之贈朝散大夫官其二子

韋永壽以統制官紹興末與子承節同死于和州父子同贈官

种朴洛陽人諤之子以父任右班殿直累遷熙河蘭會鈐轄兼知河州時蕃部叛屬羌何章入寇帥胡宗回使朴討之朴至州纔二日賊鋒方銳且盛寒欲姑徐之馳檄至六七不得已遂出兵羌知朴來伏以待朴遇伏首尾不相應朴殊死戰爲賊所殺事聞贈雄州防禦使官其

後十人

張玘字伯玉澠池人紹興末以御營宿衛軍前都統與金人力戰于海州北中流矢卒贈正任觀察使官其後九人廟號忠勇孝宗卽位又命祠于戰所贈清遠軍承宣使子世雄武節大夫

陳亨祖淮寧大豪紹興末以功知海寧府與金兵力戰舉家五十餘人皆死贈容州觀察使立閔忠廟于光州劉泰樞密院忠義前軍正卒也金人犯壽春泰身被數十創死贈武翼郎官其家三人

郭僕字同升祥符人以父任調東海縣尉歷遷通判全州權梁宗未行會賊張項已逼縣境衆止之僕曰安逸則

就艱危則辭非我所學竟至縣約束吏卒誓以死戰賊聞之偽降既入邑為變官皆竄伏僕曰吾為宰義不可去端坐公署賊徒至僕大罵不絕口遂遇害詔贈承議郎錄其後二人

王觀國登紹興壬辰進士授陝州宜興縣尉遇黃巾賊不屈遇害事聞詔贈官一等

王拱建康府前軍統制隆興五年與金人力戰于江北而死贈正任觀察使卽其砦立忠節廟又忠亮大夫朱贊亦死之贈承宣

吳庸淳熙間李迪作鄧州都徐邦直唐捷起兵禦不克庸歿于陣徐與唐賊而死帥劉惇上其事俱贈

仕郎仍官其子

王輝貴州人嘗為粟傳砦巡檢淳熙二年擊茶寇為賊所得欲全之含血大罵遂死贈忠州刺史與恩澤二人立

廟羅坡

楊震仲字革父成都人淳熙中吳曦招之不從飲毒死贈朝奉大夫直寶謨閣官其二子表其里曰義榮謚節毅立廟旌忠

吳政寧宗嘉定十二年女直寇西和成鳳州入黃牛堡政死之

李誠之字欽茂東陽人寧宗時知蘄州金人南侵城陷于士元戰死誠之引劍將自剄呼其孥曰城已破汝等宜

續文獻通考卷之六十三
速死無辱妻許及婦若孫皆赴水死事聞贈朝散大夫
秘閣修撰封正節侯賜廟曰褒忠

秦鉅字子野檜曾孫通判蘄州城破自焚而死贈秘閣修
撰封義烈侯祀于褒忠廟子浚渾同死贈通直郎淳祐
十二年加封鉅義烈顯節侯時教授阮希甫防禦判官
趙汝標皆死之同時死事者蘄春主簿甯時鳳錄事叅
軍兼司戶杜諤監蘄州都大監轄蘄口鎮倉庫嚴剛中
各贈官有差又統制官孫忠小將江士田陳興曹金丘
卞軍士李斌等皆鬪死司理叅軍趙與裕奪關出外求
援而全家十六人皆沒黃州陷守臣何大節亦投江死
陳霖字傅容泉州人嘉定中爲瑞金尉不屈于賊而死

徐梅龜壽昌人爲霍丘尉虜寇犯境梅龜與子尚古皆死
之理宗嘉其忠贈梅龜宣教郎尚古承信郎各官其子
劉宥知天水縣金兵犯境掠宥行橐視其諾命曰隨我去
官北朝宥罵曰我爲南朝鬼不爲番賊官遂遇害

彭義斌理宗寶慶元年領兵徇真定嚴實以蒙古兵來襲
義斌死之

陳寅咸子升卿孫知西和州寶慶年蒙古入西和寅謂妻
杜氏可避兵鋒杜氏厲聲曰安有生同若祿死不共王
事者寅死之杜氏飲藥自殺二子及婦俱死母傍賓客
同死者二十八人

黃復字乾叟沙縣人寶慶二年第進士後攝滁州因虜攻

城援不至歿在圍中遺子書曰父老矣食君之祿繼之以死雖死猶生也

賈子坤童川懷安軍人爲西和州推官寶慶中虜至城陷與其家人十二口俱死之

舒瀛字登甫奉化人登寶慶二年進士第授衢州西安尉兵難卒起瀛先衆捍敵死之朝廷嘉其忠官其子模

曹孝先字元先奉化人官承直郎任楚州軍事叅軍寶慶乙酉沒于王事贈通直郎官其子詵立廟號旌忠

劉純字君錫建陽人以父廕補沙縣簿紹定間調湖北帳幹知邵武縣會率兵招降下瞿賊爲賊所得不屈死之事聞贈朝散郎與二子下州文學後又封壯義侯謚忠

烈純之族幹謚忠顯子羽謚忠定琪謚忠肅領謚忠簡純謚忠烈爲五忠劉氏

趙師檟淮右人以罪客游于閩紹定中寇起汀州郡司農丞潘景伯嘗守高郵知師檟荐于提刑王慶龍俾統兵禦尤溪賊大書旗上曰誓不與賊俱生轉戰田中馬陷于泥賊斷左臂猶以右手殺賊力盡大呼曰師檟報國死于此矣遂歿嘉熙初都丞旨王埜上其事贈武節郎民爲立廟名忠愍

高談字景遂邵武光澤人紹定二年爲旁郡賊執欲其率鄉子弟東破武陽談唾賊大罵遂遇害而里人賴以免曹友聞字允叔彬十二世孫端平初權知沔州與蒙古兵

戰于鷄冠隘與弟萬皆死贈友聞龍圖閣學士大中大
夫賜廟褒忠謚曰節官其二子承務郎壻迪功郎贈萬
武翼大夫官其二子成忠郎

高稼蒲江人魏了翁同產也知沔州端平二年蒙古濶端
入沔稼死之贈龍圖閣直學士謚曰忠

李復明爲江陵統制端平三年蒙古將忒木斛寇江陵復
明死之

楊壽孫爲雲安軍主簿端平中元兵至中江縣與蔣官何
庾安惟臣田廣直友坤等連戰二日俱死之贈恤有加
劉銳知文州嘉熙元年元兵攻急銳集其家人盡飲以藥
而死家素有禮法幼子同哥方六歲授以藥猶下拜受

之左右感慟銳父子三人登文王臺自刎死

趙汝彞宣城人爲文州通判城陷不屈元人先斷其兩臂
而後鬻殺之

何克漢州德陽人通判黎州攝州事元兵破關自刺不死
百方誘之終不從臨死時東望再拜曰臣夫婦同死可
以對趙氏無愧矣上下感泣同死者四十餘人男士麟
孫駒行從子仲桂先克死惟長子士龍得免

蹇彞潼州通川人通判金州端平中元兵攻陷金州彞舉
家死焉弟維之利州行參軍事亦迎敵力戰死官其子
王迸字純文饒州樂平人紹定間爲固始縣簿攝邑事金
兵犯淮守令望風遁去迸度力不能禦懷印自投于井

而死

鄭勳字景周興化縣人嘉泰壬戌登第端平中知博羅縣
熊喬部下回戍卒焚掠州境或勸勳避其鋒勳曰吾爲
長官見賊而去如吾民何衣冠坐廳事賊至諭以禍福
不屈死之事聞贈朝奉郎

陳隆之爲制置使成都將田世顯以城叛降于蒙古隆之
舉家數百口死于元兵贈徽猷閣待制加與兩子恩澤
賜謚立廟

吳從龍字雲奉化人紹定中以建寧都統制爲先鋒援不
至被擒不屈而死廟祀泰揚二州賜額褒忠官其弟從
虎

孫益泰興人紹定中李全犯揚州應縣令王燭募爲兵後
賊勢甚盛身先赴敵死之贈保義郎官其子一人同時
顧緒顧珂皆戰死贈恤亦同

王仙蜀都統守涪州二年城破自刎斷其吭不死以兩手
自槌其首而墮

曹琦蜀進士知南平軍被執脫身歸制置司辟主管機宜
文字聞統制趙安以城降就守禦地自經死

侯畝字道子樂清人寶祐五年制置使賈似道辟通判海
州與山東賊李松壽鏖戰于漣山闔室遇害立旌忠廟
于海州謚節毅仍立廟其鄉

張順民兵部將也開慶中與張貴同救襄陽不克而死立

廟祀之

陳元桂撫州人開慶元年元人侵臨江元桂力疾督戰有勸其移治者曰時事如此與其死于饑寒盜賊孰若死于守土之爲光明俊偉哉遂死之詔贈待制謚正節賜錢二十萬官其二子勅立廟死所賜額褒忠

曾損紹興人開慶己未爲瑞州錄事叅軍以州命行各縣賑恤饑民值元兵至被擒不屈死之事聞贈秩官二子羅夢棫新喻人景定元年兵入靖安夢棫死之贈宣教郎官一子

許彪孫奕之子爲四川制置司叅謀官景定二年知瀘州劉整將叛降于元命彪孫草表彪孫曰腕可斷筆不可書合門服藥死整旣降襲都統張桂營桂及統制金文德戰死納溪曹顛合門死之又景定四年沔州都統胡世全護糧運至虎象山戰死咸淳二年元兵取開州守將龐彥海死之德祐元年瀘州守梅應春以城降珍州守江彥清巷戰死之

密祐廬州人守隆興咸淳中元兵下降興密祐爲都統兵敗被執不屈而死

張漢英奉化人爲樊城守將時樊城被圍四年與都統制范天順牛富力戰不降旣城陷漢英死焉天順仰天嘆曰生爲宋臣死當爲宋鬼於守處縊死牛富身被重傷以頭觸柱赴火死裨將王福見富死嘆曰將軍死國事

吾豈宜獨生亦赴火死後天順贈定江軍承宣使
史季儉威州棋城主簿也成都陷子良震與壻楊誠夫爭
先為死各特贈兩官與一子下州文學

王翊字公輔郫縣人嘉熙元年為制置使丁黼參議官元
兵破蜀朝服赴井死時轉運副使蒲東卯亦死之元兵
屠漢州權州事劉當可判官邵復錄事參軍羅由司戶
參軍趙崇啟知雒縣羅君文皆不屈而死復雍六世孫
也兵入眉州知丹稜縣馬仲燁死之取簡州簡守李大
全死之邛守趙晨力戰死之至遂寧民兵趙用拒戰臂
已斷而戰不休至重慶進士胡天啟夫婦同罵賊死翊
與趙汝彛同立廟賜謚餘褒恤有差寶祐六年元兵援

吉平隘守將楊禮周德榮死之拔長寧守將王佐父子
俱死至閬州推官趙廣死之至蓬州轉運使施擇善死
之至順慶帥守段元鑑堅守為麾下殺之以降

陶居仁蕪湖人為鎮江錄事參軍元兵來攻城陷被執居
仁日得以死報朝廷夫何憾竟不屈為所殺護棺還家
泝流數百里不時而至鄉人異之為立祠

張孝忠淮人德祐初呂文煥道元兵東下知信州謝枋得
走入安仁調孝忠逆戰團湖坪矢盡揮雙刀擊殺百餘
人後伏兵發孝忠中流矢死

王世昌德祐初權瀘州安撫使後元兵逼城誓不屈節城
破自經死

續文獻通考 卷之六十三 三十一 四六

邊居誼隨州人爲新城守將咸淳中元人進逼新城居誼
堅壁不降呂文煥至城下招之居誼射煥中其右臂率
所部三千死戰皆沒居誼赴火死事聞贈利州觀察使
立廟死所

趙昂發字漢卿昌化人德祐元年權守池州元人陷池州
昂發死之初元人遊騎至李王河都統張林諷昂發迎
降昂發瞠目視林不敢復言已而林陰遣人納款昂發
知事不濟乃謂妻雍氏曰城將破吾守臣不當去汝先
出走雍曰君爲命官吾爲命婦君爲忠臣吾獨不能爲
忠臣婦乎昂發笑曰此豈婦人女子所能也雍曰吾請
先君死昂發笑止之明日乃散其家貲與弟姪僕婢悉
遣之及元師薄城昂發晨起書几上曰國不可背城不
可降夫婦同死節義成雙遂與雍氏盛服同縊從容堂
伯顏入城問太守安在左右以死對深歎惜之命具棺
衾合葬祭其墓而去

唐震字景實會稽人爲饒州知州元軍入饒遣使來取降
款通判微諷震降震怒叱之曰我何忍偷生負國也城
中年少感震言殺元使者已而城陷執牘使署降震不
屈遂死焉兄椿與家人俱死贈文華閣待制謚忠介廟
號褒忠官其二子震容馮驥何新之後俱死節

江萬里都昌人以故相家居聞元兵破襄樊乃鑿池芝山
後圃扁其亭曰止水人莫喻其意及城欲破遂赴止水

死左右及子鎬相繼投沼中積屍如疊翌日萬里屍獨浮出從者斂葬之贈太師益國公謚文忠

鮑廉知臨江軍元人徇臨江廉死之

馮仲燁知丹稜縣元兵入眉州仲燁死之

米立爲江西都統元軍畧江西立逆戰於江坊兵敗被執不降繫獄制置使黃萬石舉軍降元元行省遣萬石諭立曰吾官銜一牙牌書不盡今亦降矣立曰侍郎國家大臣立一小卒耳但三世食趙氏祿趙亡何以生爲立乃陳上生擒合死之人與投拜者不同萬石再三諭之不屈遂遇害

阮應得守無錫德祐中蒙古兵入無錫應得死之

王汝翼知廣德縣德祐中元人入廣德汝翼死之

司馬夢求監岳州沙市城鎮德祐中蒙古阿里海涯入岳州沙市城夢求死之夢求司馬光五世孫也

夏椅安慶通判蒙古兵犯安慶知府范文虎以城降椅力不能自爲曰有死而已乃飲藥卒衣襟中有遺筆云職當其遽厄逢其否負吾君親方寸亂矣命無所逃當死而死五十六年歸其天理

趙與穉守寧國德祐初蒙古陷寧國與穉死之

姚訔知常州德祐初蒙古伯顏陷常州訔與通判陳炤都統王安節死之炤字光伯常州人城陷或勸走常熟炤曰去此一步非死所矣遂止死焉安節堅之子也守常

州方圖恢復不克而死贈嘗龍圖閣待制炤直寶章閣
並官其子時節度判官胡應炎武進知縣包圭俱晉陵
人亦同戰死

徐道明常州玄妙觀道士德祐初元兵屠城道明知太守
姚嘗死守取觀之文籍置石函藏坎中危坐炷香讀老
子書兵至以刃脅使拜不爲動遂死之

汪立信新安人德祐元年賈似道將出師召立信爲招討
俾就建康府募兵以援江上諸郡既至建康守兵悉潰
四面皆元兵立信知事不可成率所部四十人至高郵
欲控引淮漢以爲後圖及聞似道師潰嘆曰吾今日猶
得死宋土乃扼吭而死

劉霖昌州永川人後居瀘州安撫使梅應春以城降元霖
說合州張珪潛斬關入城殺應春復瀘州珪以霖知南
平軍後卒死于兵

彭震龍永新人知永新縣值元兵至城守不下親黨劉槃
內應執震龍去震龍罵不絕口腰斬之

蕭燾夫與兄敬夫吉安人見文天祥起義兵兄弟協贊彭
震龍謀復永新縣屠兄弟同死之

尹玉寧都人從文天祥勤王死于伍牧贈濠州團練使官
其二子賜田二頃以恤其家

程洙休寧人淳祐十年進士授貴池縣簿調上元縣德祐
元年建康陷百官投牒降附程洙自縊而卒

李成大字實夫建昌人德祐初知金壇縣元兵至與戰不
勝吏民脅之降乃潛與胡用存謀復金壇事泄繫獄至
殺其二子終不屈死贈直秘閣謚忠節
李天勇臨川人德祐初元攻饒州天勇統強壯應援兵敗
與張忠孝俱死之

李芾字叔章由廣平爲汴人官潭州知州元兵圍潭日久
芾慷慨登陴與諸將分地而守民老弱皆結保伍相助
不令而集芾日以忠義勉其將士死傷相籍猶乘城殊
死戰城將陷召帳下沈忠遺之金曰吾力竭分當死吾
家人不可辱于俘汝盡殺之而後殺我忠泣而諾取酒
飲其家人盡醉乃徧刃之芾亦引頸受刃忠縱火焚其

居還家殺其妻子復至火所大慟舉身投地乃自刎叅
議楊震赴園池死妻妾奔救無及遂皆死幕僚陳億孫
顏應焱皆死潭民間之多舉家自盡城無虛井縊於林
木者相望寶慶通判曾如驥亦不屈而死事聞贈芾端
明殿學士謚忠節

尹穀衡州進士寓居潭城元兵至知事不可爲乃爲二子
冠招鄉人行冠禮鄉人曰此何等時行此迂濶事穀曰
正欲令兒曹冠帶見先人于地下耳旣畢禮與其家人
自焚潭太守李芾命以酒酹之

李長庚爲湘潭丞元兵至被執不屈死之
趙良淳汝愚曾孫爲安吉州知州與提刑徐道隆固守元

兵圍安吉范文虎致書誘良淳降良淳焚書斬其使既而戍將吳國定開門納元兵良淳閉閣自經道隆見執守者少怠亦赴水死

鄧得遇字達夫邛州人德祐二年爲廣西提刑守蒼梧元人徇桂林州南望拜書紙曰宋室忠臣鄧氏孝子不忍偷生寧甘溺死彭咸故居乃吾潭府屈公子平乃吾伴侶優哉游哉吾得其所遂投南流江而死

徐夢發浦城人登嘉熙二年進士第累官朝議大夫廣奉招捕使德祐二年元兵下江南夢發守仙霞襲兵猝至左右皆潰夢發獨踞坐大詬遂遇害

李申巽知上猶縣德祐二年元兵攻上猶申巽死之邑人李梓一家四十七口俱死之

豐存芳字公茂鄞人稷玄孫也爲太平州倅景炎元年蒙古兵至知州孟知縉謀以城降存芳諫不聽詈之知縉遂引蒙古兵屠其家同死者十八人卒方義竊其八歲孤匿民間得存其祀

劉子存字貢伯安福人爲廣西經畧使叅議官元兵至靖江時宋主已入燕子存取笏書曰我頭可斷膝不可屈堅守而死

呂文信文德弟也德祐初以沿江副使咨議官與元兵遇于白鹿磯戰死贈定遠軍承宣使官其子立廟賜額時河湖巡檢張興宗亦死之贈武翼郎仍賜錢官其子

鍾季玉樂平人德祐時爲大都提點坑冶元兵渡江徙寓建陽兵至不屈死之

潘方平陽人監慶元府市舶慶元降元方不屈死之

耿世安爲兩淮都撥發官迎元兵鏖戰身被七創猶能追殺收兵還至數里歿贈五官立忠武廟于淮安

丁黼成都制置使也與元兵力戰死于石筍街賜額立廟王孝忠爲鎮江前軍統制兼淮東路分戍淮陰楊貴叛孝忠率衆迎戰俄永軍統制朱信降賊孝忠力不敵死焉姜才濠州人貌短悍知兵善射騎爲通州副都統與元兵屢戰屢勝復守揚州元將使人招之才曰吾寧死豈作降將軍耶被執死之

蕭龍雷字顯辰新城人建昌降元與同里人黃巡檢起兵圖興復度勢不可支將奔入閩爲同安武人徐浚冲獲送縣縣尹劉聖仲素與龍雷有怨殺之後聖仲于小孤山見其神驚死

宋應龍以諮議官寓泰州元兵至裨校開門迎降應龍與其妻自縊園中

褚一正字粹翁廬州人武舉進士爲提刑諮議督戰高沙被創竟没于水知興化縣胡拱辰縣破亦死之

張鏜衡山人浚之後益王立詔天下勤王鏜起兵衡山得民兵數千與文天祥接應旣而兵敗被執元參政崔斌欲降之鏜罵曰今日降而死何以見我祖魏國公于地

下斌令述起兵本末鏗奮筆斥罵千百言斌怒殺之

鄒鳳字鳳叔吉水人從文天祥勤王死事同死者泉州陳

龍復廬陵劉子浚劉沐龍泉孫臬永新彭震龍蕭陶寧

都陳繼周蜀人張忬太平州步卒呂武安豐軍人鞏信

太和蕭明誓丞相範從子杜沂閩人林琦温州人徐臻

幕下書史蕭資職書司金應樂安何時贛州陳子敬何

陳二人隱竄不知所終

劉士昭太和人嘗為鍼工與鄉人同謀復太和縣事敗血

指書帛曰生為宋人死為宋鬼赤心報國一死而已以

帛自縊死又有王仕敏者與士昭同謀而敗題其裾曰

此生無復望生還一死都歸談笑聞大地書為腥血汚

好收吾骨首陽山臨刑嘆曰恨吾失聲不能大罵

趙孟壘合州人為金華尉臨安降與從子由鑑懷太皇太

后書詣益王擢宗正寺簿監軍復明州戰不屈磔死

孟余福王與茵從子也元兵駐紹興余謀舉兵事泄執至

臨安范文虎詰其謀逆余詬曰賊臣負國厚恩共危社

稷我帝室之胄欲一泄宗社之耻乃更以為逆乎文虎

怒驅出斬之過宋廟呼曰太祖太宗列聖之靈在天何

以使孟余至此都人莫不隕涕既死雷電晝晦者久之

上官夔萬州守將也元兵圍城夔戰守甚力招之降不從

城陷巷戰而死

吳楚材名炎建昌南城人德祐元年建昌降明年春楚材

還其鄉領村糾集民兵攻城元兵三道蹙之奪其長梯
鐵鈎因進攻領村不得入事聞益王府元帥承制遷楚
材宣議郎帶令太社令知建昌軍俾聚軍圖再舉時江
西制置使黃萬石匿其命楚材既失利且乏援走光澤
爲人所執及其子應登以獻郡遣錄事婁南良訊之曰
何爲錯舉楚材抗聲曰不錯不錯如府錄所爲乃大錯
耳府錄受宋官爵今乃爲敵用事還思身上綠袍自何
而得吾一鄙儒特爲忠義所激爲國出力事雖不成正
不錯也南良媿而語塞後爲江西制置招討使斬其父
子傅首諸邑益王聞而哀之贈官朝奉郎卽邵武境上
立廟賜名忠勇

黃介字剛中分寧人德祐初率鄉兵爲保聚計北兵奄至
面中六矢不動復中十三矢倚柵而死妻劉被虜子用
中逃不死及壯求母十三年始獲人稱黃孝子

張珏字君玉鳳州人德祐初知重慶府守節不屈而死時
閬州守將楊大淵推官趙廣蓬州守將張大悅運使施
擇善皆死節

趙立字德修重慶人德祐初爲大社令湖北提刑使趣蜀
諸將入衛不成自沈于水

周偉德祐間爲浮梁丞元兵起偉曰以守無城以戰無兵
柰何然受人之命而不爲其事非仁也食人之祿而不
死其難非勇也卒死之

趙與擇秀王嗣也德祐二年出鎮瑞安與守臣方洪同伏節而死又有趙孟錦者襲元兵不克而死

徐道隆字伯謙武義人德祐初以江陵提點刑獄入援臨安爲元兵所執與子同赴井死贈官賜謚厚恤其家立廟吉安

洪福夏貴家僮也從貴積勞爲鎮巢雄江左軍統制江北降福與子大淵大源復之貴降元招福不聽使從子往福斬之後爲貴詭誘破城先戮其子次及福福大罵數貴不忠請身南向死以明不背國也聞者流涕

高應松字質畝長樂人開慶元年進士官翰林權直德祐末元兵至臨安應松不肯草降表後從弟昂至燕絕粒不語越七日卒

陳奎安仁人益王卽位奎領江東安撫使師屯火焚山戰潰復起兵敗于積烟山與弟年同死之

林空齊永福人失其名舉進士歷知縣解官家居益王立張世傑圖泉州乃率鄉人黃必大劉仝祖卽其家開忠義局起義兵復永福值王積翁以福安送欵約北兵屠永福空齊乃盛服坐堂上嚙指血書壁曰生爲忠義臣死爲忠義鬼俄見執不屈而死

李庭芝字祥甫由汴徙爲應山縣人恭帝時守揚州兀术圍揚久庭芝與指揮使姜才守禦益力及臨安旣陷兀术以太皇太后手詔諭降庭芝登城謂使者曰奉詔守

城未聞以招諭降也及帝如瓜州太皇太后復賜庭芝
詔庭芝不答及夏貴以淮西降兀朮復遣貴降卒至城
下示庭芝庭芝曰吾惟一死而已使者復持詔招之庭
芝開壁納使者斬之焚其詔於壁上已福州使至庭芝
與姜才將兵七千趨泰州兀朮驅庭芝妻子至壁下招
降會姜才疽發背不能戰泰州守將胡惟孝孫貴開門
納元兵庭芝赴運池中水淺不死遂與姜才俱就執兀
朮責其不降才曰不降者我也憤罵不已皆見殺揚民
聞者莫不泣下

徐應獮字巨翁江山人爲太學生景炎元年蒙古伯顏入
臨安應獮與其二男琦松一女元娘同登樓自焚諸僕
撲火救免乃同赴井死益王立贈秘閣修撰

黃俊爲廣州權鋒將景炎元年蒙古軍入廣州俊死之
苗再成爲直州守將景炎元年蒙古兵陷直州再成死之
趙時踐字容月宋末人僑居采石德祐間攝建平縣事元
人南下入縣撻鼓禦敵勢窮與妻子僕妾九人赴溪潭
死焉

馬塋宕昌人以六郡鎮撫使守咸淳府元將楊文安與塋
同里招降不聽旣而城陷悉力巷戰死之

丘必明保昌人官韶州僉判德祐中元兵逼城下必明不
屈爲敵所殺白血流地韶人哀其忠節立祠祀之

馬堅爲靜江守將時阿里海牙克靜江府斷其首猶握拳

奮起立踰時始仆墜既死部將婁鈐轄等守月城求牛
米揀饑而降既得食之擁一火砲然之聲如雷震城皆
崩烟焰蔽天外兵多驚死者火息入視之灰燼無遺
黃文政淮人戍蜀軍潰間道走靜江馬堅邀與同守城破
文政被執大詬不屈元人斷其舌以次剝削之文政含
胡叱咄比死不絕聲

熊飛曾逢龍與元人戰於南雄敗績曾死之飛奔韶州元
人圍韶州守將劉自立以城降飛率兵巷戰敗赴水死
陳文龍字君貴興化人俊卿之後益王稱制時守興化被
執元兵欲降之文龍指其腹曰此皆節義文章也可相
逼耶卒不屈乃械送杭州文龍不食死

趙時賞張日中德祐二年元李恒襲文天祥於興國縣天
祥出走師潰於空阬時賞日中皆死之

趙希洎宗室子居宜春德祐中以廣東轉運使勤王文天
祥兵敗與從子必向被囚俱不食而死

陳瓚文龍從子也守興化元唆都攻之瓚閉城拒守唆都
臨城諭之矢石雨下城破巷戰終日獲瓚車裂之

張德興淮安人景炎二年與淮西野人原寨劉源等起兵
興復司空山與黃州壽昌未幾元襲破司空山復陷壽
昌德興死之

劉伯文吉水人景炎二年伯文請督府受文書結約遠近
為巡兵所執斬于袁市慷慨自引一不累人

陳學心安仁人歷官高州知府謝枋得起兵令守安仁元
兵至力戰而死時餘干張仁旦亦率鄉兵應枋得力戰
而死

楊恕字仲如四明人篤學力行歷陞憲司知事宋祚將危
以忠義自勵不食數日赴菱塘而死

袁鏞字天與鄞人咸淳進士尚氣節元兵至鄞鏞往軍前
責以大義元將苛其才脅令降縱火燎之鬚髮盡不少
變遂死其日家人驚悼赴水死者十有七人

馬發知朝州景炎中蒙古兵陷朝州發死之

顏思立顏起巖鞠叔華聞文丞相開府于汀相結赴義後
元兵奄至三人同日死之

張烈良為河南制置使帝昺祥興元年起兵應厓山與元
阿里海牙戰敗死之海南州縣皆陷沒趙與珞亦死之
陸秀夫字君實塩城人以左丞相輔帝昺于崖州儼然如
治朝祥興二年元張弘範攻厓山張世傑兵潰秀夫奉
帝昺赴海死時丹徒茅相以秀夫薦授兵部侍郎亦同
死於海

高貴祥符人舉進士累官知高郵府扈從之海上擢樞密
使與陸秀夫同死厓山

彭呂泰和人元兵陷虔呂不屈入廣從文丞相赴難死

蕭資吉水人文丞相幕下書史與元兵遇死之
吳希奭安福人文丞相起兵奭自以名通于督府後遇元

續文獻通考 卷之六十三 五十一
軍衆寡不敵一門三十口俱死之

伍隆起新會人三世仕宋末隆起率義兵從帝昺于厓山與元將張弘範力戰不屈其麾下謝文子殺隆起降弘範宋相陸秀夫惜之刻木爲首以葬又募人執文子戮以祭墓

孫臬文丞相之妹婿也丞相方擁兵出贛臬爲叛者所陷不屈死之

劉昂孫江陵人官翰林學士德祐初從二王至厓山陸秀夫負王赴海死昂孫亦驅家屬並輜重沈海不死爲元兵所執榜掠無完膚一夕得脫卒蹈海死

劉洙廬陵人文丞相隣曲也兵敗被執至豫章與長子同日被刑

張雲吉水人城降元雲不勝忿乃謀興復引所部夜襲元營天明戰渴赴江飲水元軍衝擊之雲赴水死

趙孟濟以功知清江後元兵至城陷孟濟死之

張世傑范陽人以樞密副使越國公立衛王昺于厓山旣敗欲浮海再圖恢復颶風大作舟人欲抵厓世傑曰無以爲也爲我取辦香來乃焚香祝天曰若天不欲復興宋室則大風覆我舟舟遂覆世傑死之

汪繼宗歙人生淳祐間見國祚不競有恢復中原之志福王與昺召見愛之妻以女宋亡自以受國恩不卽死無以見祖宗于地下遂不食而卒

王用龍進賢人宋亡用龍誓不爲異國民後爲元鎮守兵
所獲碎斃器劇吭而死

謝君直名枋得號疊山信州弋陽人景定甲子江東漕闈
校文發策問權姦誤國趙氏必亡忤賈似道貶興國軍
三年遇赦得還元兵南下郡城潰棄家入閩至元二十
三年御史程文海承旨留夢炎等交薦累召不赴二十
六年春正月福建行省叅知政事魏天佑復被詔旨集
守令成將迫促上道臨行以詩別常所往來者曰雪中
松栢愈蒼青扶植綱常在此行天下豈無龔勝潔人間
不獨伯夷清義高便覺生堪捨禮重方知死甚輕南八
男兒終不屈皇天上帝眼分明夏四月至京師不食死
年六十有四秋八月子定之奉柩歸葬門人誄而題之
曰文節先生謝公墓

家鉉翁眉州人宋末知建寧府兼福建轉運副使後簽書
樞密院事元兵迫郊鉉翁獨不署降表宋亡旦夕哭泣
不食飲者數月成宗卽位放還賜號處士錫賚皆不受
羅一理進賢人宋亡謝枋得爲江西招諭使一理偕弟起
潛赴義被擒不屈皆腰斬弟臨刑謂一理曰今日得死
所矣

文天祥吉水人宋右丞相少保信國公初元張弘範襲執
天祥於五坡嶺天祥吞腦子不死至潮陽見弘範左右
命之拜天祥不屈厓山旣平弘範謂天祥曰國亡丞相

忠孝盡矣能改心以事宋者事大元將不失為宰相也
天祥泫然出涕曰國亡不能救為人臣者死有餘罪况
敢逃其死而貳其心乎乃以天祥北去道經吉州痛恨
不食八日猶生乃復食至燕館人供帳甚盛天祥不寢
坐達旦遂移兵馬司設卒守之既而丞相孛羅召見天
祥入長揖欲使跪天祥不屈孛羅怒命囚於獄所作有
正氣歌已而又召天祥於獄欲用之天祥固辭欲殺之

續文獻通考卷之六十四

皇明進士雲間王圻纂輯

節義考 忠臣三

遼

阿果達為遙輦帳詳穩酌古為客省使高清明為勃海詳
穩海里為天雲軍詳穩聖宗開泰中同蕭排押等與高
麗戰於茶陀二河遼兵失利阿果達等皆死之

撻烈哥為國舅詳穩蕭打里為官使聖宗統和四年與宋
戰于莫州皆死之

撻不野為北路招討使道宗大安九年西北夷磨古斯偽
降既而乘虛來襲撻不野死之

金 胡沙虎完顏部人太祖時從軍爲詐降人高永昌所執神色自若罵永昌曰汝叛君逆天今日殺我明日及汝矣罵不絕口死贈遙領節度使

特虎雅撻瀾永人太祖時從軍以死捍遼兵没于陣皇統間贈明威將軍

粘割韓奴皇統中以仗義將軍護衛招耶律大石降大石憤其不下馬且挾使跪韓奴不屈而死世宗贈昭義大將軍

曹珪徐州人大定四年州人江志作亂珪子弼在賊黨中珪謀誅志并弼殺之詔以大義滅親進一官正班用之

溫迪罕蒲覲爲兀者群牧使被賊執欲其同反曰吾世受國恩子姪皆仕宦不能從汝而累吾族也賊斃之子孫皆被害

鶴壽鄆王昂子五院部人老和尚率衆招鶴壽同反不從遂與二子俱見殺

訛里也契丹人大定初招諭契丹窩幹不屈節死褒贈納蘭綽赤咸平路猛安人不從契丹括里招後被執斃殺之褒贈

魏全壽州人泰和六年爲宋將李爽所執至死罵不絕口鄩陽宗室子爲符寶祗候至寧元年爲亂臣紇石烈執中所害贈宣武將軍順天軍節度副使

夾谷守中咸平人至寧末爲彰德軍節度使城陷爲下人所執欲其招降平涼守中僞許之至城反其辭交刃殺之贈資善大夫東京留守

王晦高平人有將帥才明昌初累官翰林學士勸農使順州受兵其故部曲王臻者欲說之降晦不從竟就死加贈其官命有司立碑歲致祭焉

石稜元毅咸平路人明昌中官彰德府治中奮力禦敵而死贈武信將軍

伯德梅和尚泰州人正隆時爲崇義軍節度使與敵拒戰而死贈龍虎衛上將軍

烏古孫兀屯上京路人貞祐中以元帥左監軍留守北京後以兵入衛中都守定興軍敗而死

高守約字從簡遼陽人宣宗時爲觀州刺史元兵徇河朔不屈而死贈崇義軍節度使謚忠敬

和速嘉安禮字子敬大名路人宣宗時爲泰安州刺史被元兵執或以酒監對安禮曰我刺史何諱爲使跪不屈以戈撞其胷殺之贈泰定軍節度使謚堅貞

王維翰字之翰利州龍山人宣宗時爲定海軍節度使結營自守力窮被執不降死妻姚氏亦同死贈中奉大夫姚氏芮國夫人謚貞潔

移刺古與涅宣宗時爲安化軍節度使與元兵力戰流矢連中其頰拔去復中其頰死贈安遠大將軍

宋晟宛平人宣宗時爲沁南軍節度使元兵至懷州城破
死之

王祿爲泗州新城提控宣宗時宋人襲泗州祿死之

木甲法心宣宗時守密雲家屬在薊州者爲元兵所得示
以不降則盡殺法心不顧城破而死贈開府儀同三司
樞密副使封宿國公同死者咬查刺紕舍十方奴皆贈
官仍命樹碑以時致祭

高錫字永之宣宗時爲河北東路按察轉運使城破自投
城下而死

吳僧哥西南路部落人宣宗時以同知太原府事死于元
兵贈鎮國上將軍順義軍節度使

蒲魯虎宣宗時爲陝州宣撫使元兵取潼關戍卒皆潰蒲
魯虎獨禦戰兵敗死之

完顏訛可爲同州節度使宣宗與定時元兵取同州訛可
死之

合納蒲刺都守潞州興定中元兵攻潞州刺都方戰死之
贈御史大夫

烏古論德升益都人宣宗時以河東元帥不能完城自縊
死其姑及妻皆自殺贈翰林學士承旨以奉御俸養其
幼子兀里偉

張順淄州士伍宣宗時元兵圍淄州行省提控王庭玉將
兵救之使順往覘爲所執使宣言行省兵敗宜速降順

佯許之至則反其辭臨死曰得爲忠孝鬼足矣贈宣武將軍同知棣州防禦使事有司給養其親任用其子孫郭斌會州將也元兵圍會州城斌驅妻子入一室焚之已而自投火中死

馬驤禹城人宣宗時爲濟陰令爲元兵所執求金曰吾書生何從得是又使跪曰吾膝不能屈欲殺卽殺得爲大金鬼足矣遂死贈朝列大夫泰定軍節度副使

伯德衮哥奚人宣宗時以東勝軍節度使死于元軍與屯醜和尚宣宗時以代州經畧使被元兵執不屈死完顏六斤中都人宣宗時以元帥右監軍守潞州與元人力戰而死贈御史大夫

女奚烈幹出宣宗時仕至植州刺史元兵至曰吾曹坐食官祿可忘國家恩乎誓力戰而死爲張提控所害

時茂先密州人紅襖賊據密州時過茂先所居村居民相率迎之茂先獨罵不迎賊執而殺之至死罵不絕詔贈武節將軍同知沂州防禦使

溫翹罕老兒爲同知上京留守事蒲鮮萬奴攻上京其子鉄哥生獲老兒脅之使降不從鉄哥怒亂斫而死贈龍虎衛上將軍婆速兵馬都總管

梁持勝字經甫宣宗時以保大軍節度使守鄜州城破自投崖下死贈特進知延安府事

紇石烈鶴壽河北西路人宣宗時行元帥府于鄜州城破

續文獻通考 卷之六十四 五
猶據土山力戰而死謚果勇

蒲察婁室東北路人宣宗時以孟州防禦使救鄜州死之
贈資德大夫定國軍節度謚襄勇

任福爲沔城縣軍官宣宗時元兵下沔城福死之

馬甫爲潞州都統宣宗時元兵攻潞州甫死之

劉仲亨爲錦州元帥宣宗時元兵徇錦州仲亨死之

汝奚烈資祿咸平府人宣宗時以金安軍節度使救鄜州
被執不降死贈銀青榮祿大夫中京留守復錄其子

完顏訛出虎爲汾州節度使宣宗時元兵徇汾州訛出虎
死之

郭思爲平陽提控宣宗時元兵攻平陽用死之

李革及從坦知平陽府事權參知政事行尚書省宣宗時
元兵下平陽革及從坦死之

納合蒲刺爲潞州元帥右監軍王良臣爲都參議官脩起
居注宣宗時元兵收潞州蒲刺及良臣死之

趙益太原人宣宗時爲太原同知城將破焚其府庫殺妻
子投其符印于井遂自殺贈銀青榮祿大夫河東北路
宣撫使求其子孫錄用

侯小叔河東縣人宣宗時以權元帥左都監守河中凡言
降者皆斬之有表兄張先諷以保妻子侯卽縛先于柱
而殺之後城破而死下詔褒贈

郭秀爲武州軍事判官宣宗時元兵下武州秀死之

續文獻通考 卷之六十四
喬天翼爲合河縣令宣宗時元兵下合河天翼死之
烏古論仲溫爲鎮西軍節度使宣宗時元兵下嵐州仲溫
死之

王佐字輔之霍州人宣宗時主沁州玉女寨救襄垣中流
矢卒贈金吾衛上將軍

黃摑九任臨潢人宣宗時知彰德府元兵至戰沒贈榮祿
大夫南京留守仍錄用其子孫

王毅大興人以經義進士累官至東明令貞祐末東圍急
毅率民兵願戰者數百人拒守城破率衆抗戰力窮被
執縣人王八欲降之毅厲聲曰忠臣不佐二主驅殺者
以刀斫其頸不屈而死

烏林荅乞任大名人宣宗時以元帥右都監援中都戰沒
贈榮祿大夫參知政事以參政半俸給其家

陀滿斜烈咸平路人宣宗時知彰德府事城破死之

高霖東平人官兵部尚書參知政事中都留守兵亂死之
謚文簡

高憲遼東人爲博州防禦判官遼陽城破死于兵

粘葛貞宣宗興定二年權元帥守晉安城破貞與府官十
餘人皆死之

徒單航宣宗時爲安州刺史元兵大至謂民曰我家兩世
駙馬受國恩不可降民曰太守不屈我輩願同死守及
城將危航先縊其妻孥謂家人曰我死卽撤屋焚之遂

自縊民同死者甚衆

完顏陳和尚名彞字良佐宣州人宣宗時以忠孝軍統領戰于三峯山敗走鈞州城破殺掠稍定乃出自言曰我忠孝軍陳和尚也我死亂軍中人將謂我負國家今日明白死時欲其降斫足頸折不屈割口吻至耳噴血而呼至死不絕大將義之酌以馬湏祝曰好男子他日再生當令我得之贈鎮南軍節度使塑像褒忠廟勒石紀其忠烈

伯德爲東勝州節度使宣宗時元兵徇東勝伯德不屈死之

移剌阿里合爲霍州刺史宣宗時元兵下好義堡阿里合死之

楊沃衍朔州人爲北邊屯田小吏後守鈞州元兵使人誘降沃衍拔刀斫之曰我起身微賤蒙國大恩汝欲以此汚我耶遂語部曲後事望汴京再拜且哭曰無面目見朝廷惟一死耳卽自縊從死者十餘人

楊敏中淄州人故致仕屯留主簿宣宗時元兵取淄州與判官齊鷹揚郡民張乞驢等募兵備禦城陷率衆巷戰鷹揚戰死敏中乞驢被執不屈而死贈敏中同知橫海軍節度使乞驢同知淄州軍事

完顏承輝宗室也宣宗貞祐元年爲右丞相都元帥元人圍燕京承輝與抃撚盡忠期同死社稷盡忠不從承輝

乃辭家廟召左右司郎中趙思文謂之曰事勢至此惟有一死報國耳乃盡出財物給散家人仰藥死

與哥鳳翔人起于群盜人呼曰熱劉後于清化戰死元兵酌酒以吊西州耆老語之至爲泣下

烏古論黑漢以親軍入仕爲唐鄧元帥府把軍官哀宗時元兵攻急城中糧盡人相食黑漢殺其愛妾啖士士爭殺其妻子黑漢守益堅後爲宋軍所獲脅使降不屈死馬慶祥字瑞寧淨州人宣宗時守鳳翔命盡工肖其像付家人出城外殊死戰矢盡元兵圍之數匝欲降之竟不屈而死贈輔國上將軍恒州刺史謚忠愍凡同死者十有二人哀宗爲立褒忠廟仍錄其孤

陀滿胡士門字子秀策論進士也哀宗正大三年爲臨洮府總管城破被執誘之降不應使之跪不從以刀亂斫其膝頸終不屈遂殺之贈中京留守立像褒忠廟仍錄用其子孫

完顏愛申爲順德節度使哀宗正大四年元取順德愛申死之

草火訛可爲權簽樞密院事正大八年元取河中府訛可死之

姬汝作字欽之汝陽人哀宗時守汝州力戰而死

馬肩龍字舜臣宛平人哀宗時同守汝州晝夜二十戰力盡乃已肩龍以劔自剄詔各贈官配食褒忠廟

續文獻通考 卷之二十四
禹顯雁門人哀宗時權元帥府都監守襄垣軍內變城破
被擒帥不忍加害既而密遁去將往從上黨公軍復爲
追兵所執不屈死

張邦憲秦州人正大中進士爲永固令天興二年避兵徐
州被亂兵卓翼所執將驅之北罵曰我進士也朝廷用
爲邑長可從汝曹反耶遂遇害

商衡字平叔曹州人哀宗時爲秦藍總帥府經歷官爲元
兵所得欲降之不屈望闕瞻拜曰王將無狀亡兵失利
臣之罪責亦無所逃但以一死報國耳遂引佩刀自剄
水甲脫魯灰上京人哀宗時以元帥屯商州大吉口將潼
關兵入援至商山遇雪元兵邀擊之士卒凍餒不戰而

灰被執不屈拔佩刀自剄

登州判官也爲元兵所得驅令攻城邦傑曰吾荷
忠詎忍攻吾君之城與之酒食不顧乃被殺

夫字晉卿二原人嘗以進士主鄆縣簿事家居金未
詔徙入關爲元游騎所執將褫衣害之達夫大言曰我
金國臣子旣爲汝所執不過一死忍袒裸以贖天日耶
遂見殺兩山潛伏之民皆曰如此好官他日祠之當作
我橫山之神

烏林荅咬任爲防禦使哀宗時元兵薄鄭州咬任死之
慶山奴守許州哀宗時許州兵變降元慶山奴死之
張若遇攝臨須令哀宗時元兵徇臨須若遇死之

馮延登字子俊吉州人哀宗時以翰林學士奉國書至金
金欲誘鳳翔帥不從再三迫誘以刀截去其鬚髯岸然
不動乃監之豐州後放還權刑部尚書元兵下汴京欲
擁之北行延登躍城旁井中死

烏古論仲端字子正哀宗時留守汴京數言人死亦易事
以燕之春來秋去爲比書諭裴滿思忠既畢連飲數杯
送思忠出門曰此別終天矣卽自經其妻亦從死明日
崔立以城降

烏古孫奴申字道遠由譯史入官哀宗時以行省左右司
郎中兼知官省事留汴京居守崔立作變明日同御史
大夫裴滿阿虎帶自縊于臺中時同死者戶部尚書完

顏珠顥奉御完顏忙哥大睦親府事吾古孫端大理裴
蒲德輝左副點檢完顏阿撒右副點檢溫敦阿里參政
完顏奴申之子麻因左右司員外郎聶天驥

完顏褚兒都喜爲元帥哀宗時元擊大河南岸都喜死之
蒲察琦字仁卿陽信人哀宗立講議所受陳言文字琦以
安平都尉與焉崔立變後令改易巾髻琦謂元好問今
日易巾髻在京人皆可琦獨不可琦一刑部譯史襲先
兄世爵安忍作此今以一死付公然死則卽死付公一
言亦剝矣其母夢二人潛伏梁間驚寤琦曰兒意在懸
梁此鬼已先見母夢母曰兒所處是也卽自縊

蘇椿大名人以元帥守許州元兵至使招降椿卽斬之既

續文獻通考卷之六十四

而城陷不屈被殺

完顏撒合輦爲中京留守哀宗開興元年元圍洛陽撒合輦赴水死

完顏賽不花爲行省右丞相天興二年徐州降于元賽不花死之

強仲爲中都留守天興初元兵取洛陽仲死之

蔡八兒不知所始哀宗未爲忠孝軍元帥哀宗禪位承麟群臣入賀八兒不拜謂所親曰事至于此有死而已安能更事一君遂戰死

毛佺恩州人哀宗遷蔡以佺爲都尉城破自縊時同死事有滑州閻忠磁州郝乙河中王阿驢樊喬皆以職官戰

死

溫敦昌孫皇太后之姪哀宗居蔡以殿前左副點檢潛出城巡邏又潛取練江魚以供尚食與元人力戰而死

納坦胡失打前爲御史監察聞蔡州城破慟哭投水而死完顏忽斜虎爲尚書左丞哀宗天興三年孟珙入蔡州忽斜虎死之叅政孛術魯小婁室等及軍士五百餘人皆從死焉

完顏絳山哀宗之奉御哀宗傳位承麟卽自縊于幽蘭軒絳山舉火焚之元兵入衆皆逃避絳山獨不去曰吾君終于是吾候火滅收瘞其骨耳兵笑曰汝命不能保能瘞而君耶絳山曰人各事其主吾君有天下十餘年身

死社稷忍使其遺骸暴露耶吾瘞吾君之後雖寸斬不恨矣其帥奔逃稱奇男子聽之絳山乃以獎衾裹餘燼瘞汝水旁再拜號哭將赴汝水死軍士救之得免後不知所終

閻忠滑州人衛王時爲開州刺史賽哥叛忠單騎入城縛之出哀宗遷蔡與義軍招撫毛城等同日戰死

畢資倫縉山人守泗州爲宋人所執宋人賞其忠憤不撓欲全活之囚于鎮江府獄哀宗自縊宋人告資倫資倫嘆曰吾無望矣容我一祭吾君乃降耳宋人爲屠牛羊設祭鎮江南岸資倫祭畢伏地大哭投江而死

吳禹錫利州龍山人歸德受兵禹錫爲行院都事經畫守禦一府倚重聞變或勸以微服免不從遇害

郭嚇蝦會州人哀宗時知鳳翔府守節不屈而死

王浩哀宗末爲扶溝令民錢大亨等執浩送款于元以有恩于民不忍加害遣所知勸之降終不聽於是殺之無血主簿劉坦尉宋乙並見害棄屍道傍自春徂夏獨浩屍儼然如生日且不瞑烏犬不敢近若有神護者

續文獻通考卷之六十四終

續文獻通考卷之六十五

皇明進士雲間王圻纂輯

節義考 忠臣四

元

李伯溫守賢之孫毅之子也元初知平陽府爲金兵所破伯溫拔劍殺家屬投井中以刃植柱刺心而死子守正爲河東路兵馬都元帥兼知平陽府後亦爲金所執不降置鐵籠中火炙死

石珪新泰人宋石守道裔元初爲山東諸路都元帥與金戰馬什被擒蒸殺於市其麾下立社兗州祀焉

董俊藁城人金末歸元以功累官左副元帥後圍金主于

歸德力戰而死封壽國公謚忠烈

攸哈剌拔都渤海人元初守太原誓與城同存亡遂死于陣

任志潞州人元初統元帥金擒其長子如山招之志親射其子死志後死于武安次子存亦爲金將武仙所殺

耶律忒末契丹人元初以河北西路安撫使致任居真定爲金將武仙所陷因誘其子天祐以趙州降當活汝父母忒末密令人語天祐曰母以我故虧臣節天祐乃殊死戰仙怒盡殺忒末家十八人後天祐亦傷憊卒

伯八兒合丹氏太祖時爲萬戶討脫鐵木兒死焉其子八剌居脫鐵木兒左右謀報父仇力窮被執逼令跪不屈以鐵搗碎其膝終不跪與弟奚不蘭同被害

合剌普華岳憐帖木兒子也世宗時爲廣東都轉運鹽使護征交趾餉道遇劇賊歐鍾等被執欲奉之爲主不屈而死贈戶部尚書守忠全節功臣謚忠愍

石天應與中人木華黎授以興中府尹從南征臨敵應變捷出如神以功累遷兵馬都元帥屯河中金兵來攻天應力戰死之

綦公直樂安人爲益都勸農官世祖召授領兵荆南等處招討使司事奉旨南伐有功後從伯顏戰洪水山追擊寢遠援兵不至公直與妻俱陷于瑗力戰而死

劉天孚字裕民大名人元世祖時知河中府爲叛臣阿思

罕兵至河中天孚極力拒守城陷被執斫河水鬪投水而死事聞贈官謚忠毅

李文爲權萬戶世祖中統三年斡縣陷文與千戶張好古死之

呂義故東平權萬戶中統四年以義死王事賜謚貞節

關文興至元中陳吊眼作亂攻漳州文興帥兵與戰死之妻王氏被掠義不受辱自投火中死元統二年事聞贈文興英毅侯妻王氏貞節夫人廟號雙節

鞏彥暉易州人代兄彥榮爲百夫長從攻宋次武昌大戰被傷度不免遂投水中敵援之載歸江州不屈而死

張懷德爲貴州知州成宗大德五年雲南土官宋隆濟反

攻貴州懷德與戰死之

董文彥爲威楚路知事文宗天曆間中慶路守敗狐叛引兵攻威楚文彥死之賜謚莊愍官其子時中爲祿豐主簿

褚君實石樓人泰定中官淮東廉訪副使汝穎盜起君實守淮安凡五年經數十百戰人比之張巡後城陷爲賊所鬻

侯彥直雅州人仕爲忠翊校尉副千戶至元間王虎寇州彥直引兵力戰于名山縣二日兵少力弱爲賊所擒義不屈罵不絕被害

蕭景茂漳州龍溪人順帝至元間漳寇亂景茂率鄉人立

柵保險堅不可破會旁里有人導之從間道入景茂被
執賊使拜不屈既欲脅之降景茂大罵賊遂縛之于樹
剖其肉使自啖嚼且曰我食我肉無若汝賊行將萬段
狗彘棄不食賊怒絕其舌而死

王伯顏字伯敬濱州霑化人至正九年知福寧州賊自邵
武間道來逼乃募壯兵五萬與子相馳破之繼賊帥王
善擁衆壓州西門伯顏與戰被執善欲其仍尹此州伯
顏叱罵不屈遂挺頸受刃頭斷湧白液如乳暴屍數日
不變復欲官相相亦罵賊死相之妻潘氏挈二女被獲
亦罵賊母子俱死御史余闕以狀聞追封太原郡侯命
立廟祀之

陳陽盈字子謙以父蔭累官侯官縣尉調泉州府稅課司
副使至正中草寇攻州知州王伯顏檄陽盈率民兵拒
敵奮不顧身陷于賊帥王善脅之使降陽盈執大義罵
賊遇害事聞勅贈敦武校尉安溪縣尹旌表其門

張桓字彥威藁城人爲西臺監察御史謝職居雄山縣城
陷賊素聞公有活人績置公上座脅之使受僞官公唾
罵之遂縛公妻奴九人至前先殺妻次殺子女及妻每
殺一人則曰御史若降餘可免公罵如初賊怒拽下殺
之時至正十一年秋八月賊譜曰張御史直鐵漢

星吉順天河西人爲江甯行臺御史大夫至正十一年妖
賊徐真一等起汝頴吉督兵討之屢有戰功後以糧盡

士疲被虜不食九日而死賊義之葬斬之鳳凰山下御
史夔夔請褒其義贈上柱國追封咸寧王謚忠肅

柴肅襄陽總管至正間竹山賊寇襄陽肅等死之

泰不華爲台州路達魯花赤至正中死事追贈江浙平章
謚忠介立廟台州賜額崇節

葉景仁字天德松溪人至正十二年由政和尉陞蒲城尹
奉省檄討政和西里寨寇勝之後深入以援不繼爲賊
所執斷其右膊大罵而死

劉天祐清江人紅巾寇起天祐結好義者謀誅之後爲賊
所執罵不絕口而死

脫脫同知萍鄉州事至正壬辰蕪黃紅巾寇起脫脫集義
兵拒戰死之

僕列篋回鶻人至正間紅巾亂藩臣檄掌東門之管城管
城陷列篋投井死妻妾子女死者十有一人

汪澤民婺源人致仕禮部尚書居宣州至正十二年蕪黃
紅巾彭黨祖構亂其餘孽自徽寇宣城宣城陷澤民被
執不屈死之贈資善大夫江浙等處行中書省左丞上
護軍追封譙國郡公謚文節

江日新歙人至正十二年蕪黃兵陷郡日新與其弟舉兵
皆死之各贈以官

伯顏不花的斤字蒼崖畏吾兒氏至正中以江東道廉訪
副使與陳友諒賊黨戰于信州晝夜不息者踰旬城陷

不花的斤自刎其部將蔡誠蔣廣皆不屈死有小民陳受多脅力不花的斤募為義兵亦痛罵不屈賊焚殺之不花的斤賜謚桓敏

樊執敬字時中鄆城人至正十二年授江浙行省參知政事賊犯餘杭力戰無援賊呼執敬降執敬怒斥之奮刀斫賊因中鎗而墮從僕馳救之亦死贈官賜謚

程擇婺源人為武昌路學正以平徭蠻有功陞本路教授至正十二年紅巾兵起以府檄起義兵固守城陷死之林夢正字古泉天台人為溧陽儒學教授賊眾寇溧陽獲其魁張某夢正問曰爾何人應曰我父為軍千戶紅巾入境逼我父為帥父以年老令我代夢正痛罵之曰爾

之父祖世為國家臣子而爾忍為盜耶既而賊勢復盛竟奪張去下令曰有生得林教授者賞夢正匿他處搜得賊曰前日罵我者非爾耶夢正曰然賊曰降我則俾爾為元帥夢正曰爾盜也我何為降再三終不屈縛于樹下解衣冠而殺之

潮海札刺台氏為靖安縣達魯花赤至正十二年斬黃賊起為所執殺于富州子民安圖襲父職為本縣達魯花赤迎戰力竭賊執而剛之時縣尹黃紹縣中進士胡斗元並罵賊而死

聶炳字蘊夫江夏人至正十二年知荊門州纔半歲而淮漢賊起陷荊門炳出募兵復之已而斬黃安陸之賊復

來攻晝夜血戰援絕城陷被執炳極口罵不絕賊以刀
抉其齒盡乃斷左臂而支解之未幾賊陷潛江縣達魯
花赤明安達爾亦死之

桂完澤永嘉人爲平江管軍鎮撫與妻弟金德同爲賊所
執縛于樹臨以白刃脅之降金德意未決完澤呼曰金
舅男子漢卽死不可聽賊德曰此言最是因大罵賊怒
剖二人腹而死

丑閻字時中蒙古氏人至正十二年知安陸州斬賊魯法
興犯安陸閻拒戰乘勝追之而賊自他門入城中火起
軍民潰亂閻乃歸服朝服坐公堂賊脅以白刃使下拜
不屈且怒罵賊酋不忍害明日又逼其從亂閻復叱之

賊以刀斫左臂脅斷而死其妻侯氏亦自縊死贈丑閻
河南行省叅知政事侯氏寧夏郡夫人表曰雙節

郭庸字允中蒙古氏監察御史累轉中書省叅政兼留守
京師事城破大將召至衆叱之拜庸曰人各爲主死自
吾分何拜之有遂遇害

梅實宣城人集慶路總管府照磨至正間大兵圍集慶乏
援乃謂友李端曰事急矣當以死殉國城陷闔門皆死
馬三湖廣省公使也素不知書湖廣爲寇陷皂隸輩悉起
爲盜拉三以從三辭曰賊名惡我勿爲賊賊怒將殺之
三遂唾罵賊乃縛諸十字木舁之以行而刳其肉三益
罵不止抵江上斷其喉委去妻隨三號泣俯拾刳肉納

布裙中俟賊遠收血骸脫衣裹之大泣投江死

劉濬字濟川興州人至正十三年為連江縣寧善鄉巡檢與江西賊帥王善屢戰屢勝後中箭墮馬與仲子律俱被執濬戟手大罵賊縛濬階下先斷手一指罵益篤再斫一指亦如之指且盡斫兩腕次及兩足濬色不少變罵猶不絕遂割其喉舌而死律亦以死拒賊義之縱使歛父屍後結死士報仇手斬殺父者張破四并擒善及寇首陳伯祥以獻磔之贈濬福建行省檢校官授律古田縣尹官為濬立祠致祭

朶里不花字端甫蒙古人至正中拜江西行省叅知政事為賊金榮所殺罵不絕口妻卜顏氏妾高麗氏皆遇害

野峻台世延子也至正中以四川行省叅政為賊所害贈官賜謚

陳君用字子才延平人至正中以權知副都元帥與紅巾賊戰于江中鎗而死贈官賜謚

李羅帖木兒字國賓高昌人至正中為襄陽路達魯花赤與賊戰被重創麾其姪馬哈失力使去曰吾以死報國汝無留此馬哈失力泣曰死生從叔父既而被賊執賊請同為逆李羅帖木兒怒罵之遂遇害馬哈失力亦死彭庭堅字允誠瑞安人至正中以功陞同知福建道宣慰使司都元帥鎮邵武屢平賊有功以麾下萬戶岳煥縱卒為暴欲繩以法岳乘不備詐為賊兵突人眾皆潰庭

堅獨留不去遇害立祠祀之旁邑亦立祠封忠愍侯
陶起祖銅陵人元末兵起嘗募集義兵官至同知後爲趙
軍所執伏義而死

鄧可賢乳源人至正中郴寇圍乳源甚急可賢率峇民并
其子弟死守凡兩月糧盡奮身出戰被執與弟七人皆
死峇民無一人降者

魏中立字伯時濟南人至正間遷饒州路總管徐壽輝攻
饒中立被執以紅衣被其體中立叱之鬚髯盡張賊執
歸斬水欲屈其從中立大罵不絕而死

湯自願餘干人至正間斬賊項普陷饒被執不屈死省憲
聞于朝命致祭

李棠卿鄱陽人仕無錫倉使張士誠入無錫被執誘以仕
不屈死之贈樂平州判官

劉耕孫字存吾至正十五年官寧國路推官長鎗賊瑣南
班等攻城時救兵遠來方疲而城恃有援不爲備賊乃
夜四鼓緣堞而上城遂陷耕孫力戰遇害弟陶孫以常
寧州儒學正死于常寧子碩以江夏縣魯湖大使起義
兵援茶陵亦死之

李齊字公平廣平人爲高郵知府至正初張士誠復攻陷
高郵齊被執不屈遇害贈翰林學士追封曹南郡公謚
忠烈

盛昭字克明歸德人由儒學官累遷淮南行省照磨遣入

高郵諭張士誠士誠不聽拘諸舟中既而官軍逼高郵士誠授昭以兵使拒官軍昭叱曰吾奉命招諭汝之拘留詔使罪不容斬又欲吾從汝爲賊耶罵不絕口賊怒先剗其臂肉而後磔之

熊義山安鄉人累官至萬戶至正間倪文俊兵至執縣尹張惟和義山保障黃山一縣獲安越二年文俊襲執之逼使速降義山罵不絕口文俊大怒剖其腹而死

王翕宣城管軍百戶至正十五年長鎗叛帥瑄南班等攻郡城將陷翕呼弟曰我受國恩遇難當死顧老母在汝等宜出避語詎即殺妻子焚其居自刎而死

朶兒只班爲中興元帥至正十五年張士誠將倪文俊復陷中興只班死之

鄭玉字子美歙縣人至正十七年大明兵入徽州守將要致之玉曰吾不得慷慨殺身以勵風俗猶當從容就死以全節義遂夫婦同縊而死

張文貴宣城百戶至正十七年天兵下寧國路守將出降文貴到死妻妾亦自殺

釋家訥爲膠萊守臣至正十七年劉福通遣毛貴攻膠萊州訥死之

王士元字堯佐恩州人至正十七年知磁州賊至州兵悉散士元安坐堂上顧其子致微使避賊子不忍去賊欲縛士元士元奮拳擊賊遂并子害之

金普庵撒里字子仁高昌人至正中以功拜江西行省叅政分省于贛陳友諒來攻城陷自剄謚曰儆哀哈海赤守贛尤有功城陷之日謂賊曰不降者我爾無殺百姓遂見殺

僧住守婺州至正十八年 大明取婺州住及浙東廉訪使楊惠死之

余闕至正間為淮安宣慰副使分治安慶屹然為江淮保障陳友諒攻城闕以孤軍血戰自刎墮清水塘中妻子皆赴井死追贈幽國公謚忠宣

余闕合肥人元至順中累官浙東廉訪司僉事分守安慶陳友諒陷安慶闕力戰死之妻耶律氏及子德生女福

童皆赴井死同時死者故守臣韓建一家皆被害事聞贈闕淮南行省平章政事謚文忠 本朝謚文宣 命有司立祠祀之

帖木補化蒙古氏也至正進士遷桐城縣達魯花赤時縣已陷敵補化乃就郡中招集其避地之民諭告切至民樂効勞守帥余闕擢為都事城陷與闕同死懷寧尹陳道夫亦闕所辟同闕死

張昇建陽人官至江西儒學提舉至正十八年陳友諒據豫章追取諸司印昇乃投其印于井不食而死

劉以忠字恕夫湯陰人至正十八年劉福通侵河朔以忠避地林縣鹿嶺山群盜襲之請以忠為主擁坐盤石眾

卒邏拜于前以忠曰我書生也不能爲國討賊反附之乎遂以頭觸石血流滿面賊度其志終不改刺殺之

于大本字德中密州人爲信州總管被賊執僞主釋其縛昇僞印一組且命以官大本投印于地痛詈之遂遇害普顏不花字希古蒙古氏至正十八年經畧江南至建寧陳友諒遣將鄧克明來寇而諸將皆遁不花誓與城同存亡卒大敗賊後爲山東宣慰使大明兵壓境城陷不花及總管胡濬知院張俊俱死之時普顏不花二弟之妻各抱幼子及婢妾溺舍南井死不花妻阿魯真欲下而并填咽不可容乃抱子投舍北井其女及妾女孫女皆隨溺焉時有申榮者平章山東行省守東昌告父

忠孝不能兩全遂自經

董搏霄字孟起磁州人官山東宣慰使都元帥有疾其功者譖于總兵太尉紐的該令搏霄從上蘭溪同征益都搏霄曰我去濟南必失請以弟昂霄代領其衆朝廷從之搏霄遂率兵北行至南皮縣魏家庄營壘猶未完而毛貴兵至諸將謂搏霄曰賊至當何如霄曰以死報國因授劔督兵以戰而賊兵突至執搏霄殺之是日濟南陷昂霄亦死事聞追封搏霄魏國公謚忠定昂霄隴西郡侯賜謚忠毅

伯顏前江西廉訪僉事至正十八年伯顏謀起兵討賊不克而死事聞謚文節

彭敬叔爲河北僉憲致仕歸道遇兵亂執之使拜不屈死
之贈兵部尚書隴西侯

喬彞字仲常晉寧人至正十八年賊襲晉寧城陷彞整衣
冠聚妻子坐大井上令妻子婢循次投井而已隨之贈
臨汾縣尹謚純潔時有張巖起字傳霖汾州人以國子
助教與妻赴井死王佐字元輔晉寧人教授里巷詬賊
不輟而死吳德新字止善建昌人工醫往寧夏爲賊所
執誓不從賊乃縛其兩手加白刃頸上迫其畏屈德新
罵不已乃曳之井上陽欲擠之而德新卽自投井中仰
罵賊賊射矢貫其頂罵益力賊以長鎗刺之然亦壯其
志憐其死曰此真丈夫也以土埋井而去

王英字邦傑益都人性剛果有大節以平寇功拜懷遠大
將軍至正間毛貴陷益都英曰吾老不能報天子尚忍
食異姓之粟以求生乎遂餓而死

張名德爲般陽總管至正間毛貴攻般陽名德死節贈河
南行省左丞謚忠襄

張輔爲陵川尹至正間山東寇亂突入陵川逼輔使降輔
抗節不屈具公服坐廳事爲賊所害

張俊山東行樞密院知院 大明兵攻益都悉力拒守城
陷携妻子投井死

張士謙樂安人知婺源州事敵兵至踰五十餘日城陷被
執先戮其妻仍加刃于頸以脅之士謙曰吾爲國死忠

豈畏死耶至死罵詈不絕追封清河郡伯

張祖信爲山東臺幕至正間毛貴入山東祖信被執不屈而死贈河南省員外郎

脫歡簽書樞密院監膠州至正間毛貴陷膠州脫歡力戰死之

神保北庭人至正間爲林州達魯花赤會劉福通兵陷林州神保與民避守蟻尖寨攻急神保懷其所授白麻投崖而死

鄧椿吉水人爲臨江府吏僞漢陷臨江率廬陵義士千百偕萬夫長楊獻與賊大戰三月兵潰投江死

蕭生吉水人爲建州儒學正用辟爲叅謀僞漢陷廬陵叅政全子仁遁去蕭生赴井死

呂震爲懿州總管至正十九年關先生等兵陷遼陽震死之贈河南左丞東平公

張正蒙暨妻韓氏至正十九年紹興兵變夫婦俱縊死女也奴年十七亦投崖而死

姜碩樂安人由相府掾累官禮部員外郎至正二十年奉詔招安陳友諒等賊不從碩大罵遂遇害事聞詔嘉其不徑不竇以偷生惟忠惟孝之在念贈禮部侍郎謚忠烈

劉玄謨爲弋陽知州至正二十一年寇兵逼州玄謨力拒十九日衆皆欲其降大罵曰吾雖死當殺此賊援兵不

至城陷罵賊而死

顏瑜字德潤曲阜人顏子五十七代孫爲鄒及曲陽兩縣教諭至正間田豐起山東瑜携家走鄆城道遇賊爲所執使見主帥瑜罵曰賊何主帥使之寫旗大詬曰我腕可斷豈能寫旗從逆賊以鎗刺之而死妻子皆遇害

燮理翰爲雲南儒學提舉至正二十三年明玉珍寇雲南城陷理翰死之

朶耳爲宣政院使至正二十三年大明兵取福州朶耳死之

齊郁博興人爲山東西道宣慰司僉事至正中大明兵取益都齊郁死之贈汝南伯

陳元善龍溪人世以儒名家至正二十七年海壩逃兵作亂渠魁薛陽以元善素行孚于鄉里欲先脅之以爲民望元善罵曰吾所畏者義不畏者死汝賊豈能久生耶與其妻郭氏及三子皆遇害

楊居仁爲開化尹饒兵陷治伏羲不屈罵賊而死

迭里彌實字子初回回人初爲漳州路達魯花赤大明兵下福州興化泉州皆納款迭里彌實仰天嘆曰有死而已及聞招諭使者至乃具公服北面再拜引斧斫其印文又大書手版曰大元臣子卽端坐拔所佩刀刺喉中以死旣死而手猶執刀按膝儼然如生時有獲獨步丁者回回人官僉廣東廉訪使有呂復者爲江西行省

左右司都事皆閒居寓福州而復以行省命攝長樂縣尹福州既下二人皆死獲獨步丁兄曰穆魯丁官建康曰海魯丁官信州先是亦皆死國難云

栢帖穆爾字君壽蒙古人累遷福建行省郎中 大明兵至福州召引妻妾坐樓上謂曰丈夫死國婦人死夫義也今城且陷吾必死若等能吾從乎皆應曰有死而已縊而死者六人有十歲女度其不能自死給之拜卽挈囊米壓之死僅匿三歲兒以全宗祀追兵入城卽舉燈自燃死

陳端孫字伯都登武舉首選出鎮福清時陳友定勒兵侵州境端孫率衆拒之中流矢墜馬被執友定脅之使從端孫憤罵曰我家三世事元今從汝反耶友定怒殺之其妻孫氏抱幼女投井死

十顏帖木兒爲知樞密事至正二十八年 大明兵至通州帖木兒力戰死之八月克燕京淮王帖木兒不華丞相慶童左丞丁敬可大都路總管郭允中皆死之

黃復圭安仁人至正兵起圭陷賊庭爲詩寫志賊怒將剖其腹圭曰腹可剖赤心不可剖遂死之

鐵木兒不花以副都元帥鎮婺源時所在寇亂戰無虛日戊戌春敵兵東下夫人披甲突陣而前謂元帥曰事至此有死無二督戰益力夫婦俱死

高文鼎爲廣東元帥至正間三山寇攻廣城文鼎力拒幾

一年援兵不至城陷遂自刎一家皆死

卜里牙敦北庭人至正中為山南廉訪使寇犯中興與戰被執不屈而死明日中興判官上都復與戰而東門失守倉皇反關力屈被執使降上都大罵賊怒刳其腹剖其肉而死

塔不台字彥暉不知何所人至正中為襄陽錄事同達魯花赤餉魏王軍于汝亳俱為賊執魏王拜乞活塔不台以足蹴曰猶欲活乎賊屈其拜塔不台拒而詬之且與縛者角遂支解

韓因字可宗汴梁人至正中應詔授唐州判官招群盜降賊黨止因于外納詔不讀詰問再三因答以恩宥寬大禍福所係甚切不聽乃縱因歸報因出乘馬周賊屯大言曰汝輩好百姓何不出降歸田而甘從逆賊賊渠追囚寸割之

卞琛大名人至正中以國子生丁母憂治農于家鄰郡盜起來標掠琛與從子小十等協謀統丁壯擊賊勢不敵為賊所執罵賊死之

趙璉字伯器潁川人宏偉之孫也至正中淮南江北行省叅知政事為張士誠所執瞋目大罵而死弟琬字德仲仕至台州路總管至正二十七年方國瑛以舟挾琬至黃巖琬潛登白龍輿舍于民家絕粒不食七日而死

孫撫字士謙曹州人至正初進士授濟寧路錄事張士誠

以高郵叛使搗副烏馬兒招降士誠拘之肆其凌辱搗不恤也後謀復高郵事泄罵聲不絕竟爲所害追封南郡公謚忠烈厚恤其家

布景龍新都人舉進士授益涼州同知時李頗驢來寇舉義兵拒之力戰終日矢盡而死

石普字元周徐州人至正中以樞密院都事從長官守淮安欲取高郵城而忌嫉者多不得盡行其志遂爲賊鎗所中猶手握鎗斫賊賊攢鎗以刺與從者皆力戰死之周鏜字以聲瀏陽州人至正中爲四川行省儒學提舉便道還家無何盜至欲推鏜爲主鏜瞠目厲聲大罵賊乃殺之時同縣有謝一魯字至道嘗舉進士爲石林書院

山長賊陷潭州爲所縛罵賊甚厲舉家咸遇害

姜天祐吉水人至正間盜起與賊力戰賊勢大盛竟死于賊雖死罵不絕口

李鉉字伯晁衛縣人至正間兄鈞字伯衡者累功至懷遠大將軍郅復上萬戶府副萬戶討寨寇于清流而歿鉉襲職守延平與寨寇戰于政和泗州橋弗克遂死之事聞追贈鎮國上將軍江東道都元帥護軍隴西郡侯

樊復字明仲進賢人至正間寇攻北山與弟文仲姪用行死之贈明仲進賢尹文仲臨川丞用行崇仁簿

雷燦鄉貢進士至正中閩中亂燦起兵助王師死之贈汀州路上杭縣主簿

納速刺丁字士瞻大名人爲淮東廉訪司書吏至正間李
璉入據興化納速刺丁力戰不勝與其三子寶童等皆
死之贈淮東元帥府經歷

陳無吝永豐人值兵亂叛寇強之從無吝曰相從可矣乞
與我紙筆乃大書一詩與寇寇怒拔其舌刳其腹含糊
罵不絕口而死

韓心淵武安人以文學徵入國子監至正間任衡水縣尹
以德化民蝗不入境調真定縣尹會掃地王作亂心淵
與子拒守城陷父子俱死之

張遠永豐人元季盜起汙陽所過殺掠遠與友羅惟遠謀
督郡兵禦寇寇知其謀被執俱不屈死之

許則祖樂平人至正間亂兵四起則祖倡義兵恢復德興
縣後屢戰勝一日追賊馬陷泥中遇害謚忠顯

楊本巖廬陵人白鹿書院山長元季兵起至吉本巖率民
兵保障遷廬陵主簿往捕東固寇盜乘勢深入本巖死
之子節聞父死力與寇敵亦死

閔本字宗先河內人始爲御史臺掾五轉爲吏部尚書移
刑工二部皆以能稱嘗上章乞謝事不允詔授集賢侍
講學士 大明兵薄京城乃北向再拜大書其職銜姓
名于壁與妻程氏及二女皆縊死

邢飛翰霍州人以兩淮鹽運司同知致仕元末兵亂被執
不屈而死追封工部尚書謚忠義

馮文舉什邡人舉進士爲雲南儒學正提舉 大明兵攻雲南文舉謂妻馬氏曰我元進士蒙厚恩今軍至有死無二汝光州馬中丞子孫其從之乎馬氏曰官人旣去生亦何益遂皆自縊

胡濬爲益都路總管 大明兵攻其城自縊死時山東宣慰副使于德文僉山東宣慰司事齊都皆死之

拜任字聞善康里人爲太子司經 大明兵至赴井而死王遜志歷官監察御史出爲江西廉訪副使召簽太常禮院元末京城不守公卿爭出降遜志獨家居衣冠而坐其友王翼來告曰 新朝寬大盍出詣官自言狀遜志斥之曰君旣自不忠又誘人爲不義耶卽日投井死

趙弘毅字仁卿晉州人爲國史編脩官 大明兵入城弘毅嘆曰我今但有一死報國耳乃與妻解氏皆自縊其子恭爲中書管勾亦與妻訣曰吾父母俱死尚敢愛生乎遂公服北面再拜縊死

黃得字殷士金谿人仕至翰林待制兼國子編脩京城旣破得赴井死

孔會心新淦人元末守臣不屈赴水死贈叅軍都錄事

陳祖仁字子山汴人至正初進士第一官翰林學士除叅知政事及順帝北遁祖仁死焉時年五十有五

朱春元末爲三原尹洪武二年 天兵克城春與妻俱投崖死

王翰字用文廬州人任福建江西行省郎中後表授潮州
總管元亡屏居永福山中 洪武中或上書薦之 命
下乃嘆曰女可更適哉遂爲詩別其友卽自引決

吳訥休寧人至正末以召授建德路判官兼民兵萬戶與
元帥李克魯攻城復之丁酉 天兵臨郡訥戰敗不屈
自刎而死

潘炎字光大扶溝人舉進士再遷襄城縣尹免官歸賊將
劉太保陷扶溝遣人辟之爲學士炎罵曰我豈從賊者
耶以首觸庭柱而死

高傳字起巖謙曾孫爲林州團練萬戶赴調遇盜邏卒且
戰且行盜率大衆突擊傳疋馬挾勁弓射無不中盜懾
不敢前援兵不至盜復合攻誘使降傳厲聲大罵力戰
而死

董成夫以軍功授察罕腦兒宣慰使司宣慰使胡寇犯邊
没于王事贈中大夫樞密院副使謚忠烈命配食廟庭
羅坎炳廬陵秀川人以征連爲寇所敗被擒備極慘酷竟
不屈而死贈番禺縣主簿

馬哈麻回回人尉政和夷兵入寇馬哈麻率鄉兵拒戰弗
利被執瞋目罵賊賊怒剖其腹腸出委地猶罵不絕口
昔里吉思爲鳳翔兵馬判官死國事贈輔國上將軍恒州
刺史廟號褒忠

張鳳儀紹州路經歷領孤軍追賊兵潰不屈死子萬里獲

續文獻通考 卷之六十五 三 四百一十七

賊首張韶卿剖胃劈肝生啖之尋補父官亦死于贛寇
李宗可有勇略善禦余闕嘗以兄女妻之以州判官權義
兵萬戶統新軍守水砦前後多戰功城破人勸之降怒
曰元帥平日遇我厚我負元帥異日何以見于地下驅
其家屬盡殺之據胡床縱飲至醉自刎

楊樸字文素河南人早以文學得推擇爲吏官至滁州全
椒縣尹盜入城樸度必死盡殺其妻女朝服坐堂上盜
欲降之樸指妻女示曰我已戍吾屬政欲死官守耳乃
連唾之賊繫之倒懸樹上而割其肉至盡猶大罵不絕
毛鐸南昌人署爲富州學正時土賊李明道據州治脅爲
從事鐸罵不絕遂遇害

祝興可寧州人世業儒與寇吳娘子等戰敗被執罵不輟
口而死

堵簡金壇人元末平章慶童領兵復松江簡爲叅謀兵敗
爲賊所擒欲留用之不屈而死

喜同河西人調南陽縣達魯花赤賊陷南陽突圍而死妻
邢氏聞同死帥家僮數人出走遇賊奪刀斫之且罵且
前亦見殺一家死者二十餘人

陳新泰和人以新淦州判居家監州達正道聞其賢辟守
州之東境寇至援少食盡被執抗節不屈死之

李廉字子敬安福人知信豐時兵起父子俱死于賊邑人
立雙節祠祀之

朴賽因不花字德中合台人爲中書政事兵至被執請速死殺之

張庸字存中温州人爲刑部尚書仍領房山團結兵至寨民李世傑執庸出降不屈而死

丁好禮字敬可真定蠡州人官中書平章政事留守京師天兵至不肯謁大將軍昇至齊化門抗辭不屈而死牛富霍丘人勇而知義爲侍衛馬軍司統制戍襄陽移守樊城累戰不少郟城破率死士百人巷戰遇民居燒絕街道以頭觸柱赴火死贈靜江軍節度謚忠烈裨將王福曰將軍死國事吾豈宜獨生亦赴火死

李黼隸州人父守中爲元工部尚書泰定中以明經魁累官宣文閣監書博士兼經筵官數與勸講至正中江南寇起出守江州路總管捍賊有功詔爲行省叅政賊大至城陷巷戰叱曰殺我無殺百姓與從子秉昭皆罵賊而死謚忠文兄冕居頴亦死于賊

曹彥可亳州人至正間妖賊起里中皆不知書者群趨彥可家以刀斧逼之寫旗彥可唾曰我儒者知有君父寧死耳豈爲汝寫旗者耶遂遇害事聞謚節愍

趙觀光鄞人以博士弟子員得推擇試吏奉化州尋遷昌國至正十年黃岩寇起昌國孤懸觀光招諭有方不擾事集明年寇衆數倍力不支遂死焉

郭嘉開州濮陽人祖昂父惠俱以戰功顯嘉有大志舉泰

定進士累官禮部員外郎至正十八年遼陽騷動特授
廣寧路總管既至賊勢日張孤城無援賊遣使脅之降
嘉殺其使開門督戰力竭死之詔謚忠烈

周宏遷安人元時爲無極寧昌昌黎三縣尹在昌黎時程
思忠作亂宏率其民赴永平城拒守城陷被執宏不屈
七日不食罵不絕口而死

福壽江南行臺御史大夫 本朝兵圍集慶福壽數督兵
出戰城破有司皆奔潰或勸之去福壽曰吾爲國家重
臣城存則生城破則死尚安往哉遂遇害

胡善至正間爲松江府學訓導苗賊陷松江欲毀孔廟善
罵賊遂被害初善聞賊至卽以死節自誓題詩于壁曰
領檄來司教臨危要致身

劉溶武進縣尹至正末寇兵陷常州官軍潰散溶獨率民
兵戰于葛橋南死之

石林宜孫元副都元帥守處州 本朝獲其弟及母以書
招宜孫不至遁入建寧復出與 王師戰敗走死于桃
坑 朝廷嘉其盡忠遣使諭祭州民立祠祀之

俞述祖象山人累官翰林國史院編脩出爲沔陽府推官
至正中斬黃賊迫州境述祖以民兵捍禦兵力不支城
陷爲賊所執械至僞主徐壽輝所誘使降述祖罵不輟
賊怒支解之贈禮部郎中象山縣男

楊乘字文載濱州人負氣博涉經史累官浙省員外郎至

正壬辰杭州陷非罪被黜依青龍章元澤以居丙申松
江時或傳張氏將起乘笑曰吾豈事二姓使果至乘知
不免以家事屬章且禮享先祠畢設飲起行後圃中顧
西日晴好慨然曰晚節如是足矣處置家事如平日夜
分就寢遂自縊遺書言死生如晝夜不足介意且以得
全臣節爲快云

